

7C d
K
THOMÆ SYDENHAM
METHODUS
CURANDI FEBRES,
Propriis Observationibus
Superstructa.

Multa egerunt qui ante nos fuerunt, sed non peregerunt: multum adhuc restat operæ, multumq; restabit: neq; ulli nato post mille secula præcidetur occasio aliquid adhuc adjiciendi. Seneca.



LONDINI,

Impensis J. Crook, apud quem veneunt
sub Signo Navis in Cœmeterio
D. Pauli. MDCLXVI.

18

4 X c



U



Ill^{mo} & Excell^{mo} Domino

D^{no} ROBERTO BOYLE.

USque adeo bonorum
doctorumque animos
quicquid ad te (*Vir undiqua-
que Nobilissime*) quoquo mo-
do pertinere conspicitur, at-
tentos continuò reddit & ex-
perrectos, ut eos prævideam
statim cognoscendi avidos,
quibus demum fretus ratio-
nibus Nominis tui longè ce-
leberrimi authoritatem ad
hujusce operis patrocinium
asciscere sustinuerim. Quid
pleriq; in simili negotio pro
more causari soleant, me

Epistola Dedicatoria.

neutiquam fugit. Est sanè
quòd ego (perinde ac faciunt
alii) de multis magnisq; tuis
erga me meritis palàm po-
pulo commentari possem;
atq; etiam grati animi speci-
men daturus, honoris ac cul-
tûs quo te prosequor duratu-
rum aliquod monumentum
multo verborum apparatu
architectari. Atqui ejusmodi
consilium (ut liberè profite-
ar) in te tam præfidenter in-
terpellando, ab animo meo
procul absuit. In immensas
laudes tuas descendere non
instrui, aut eximias animi
dotes, quibus decantatissima
anteriorum ætatum nomina
unus exæquas (uberrimam
sanè tum mihimet ipsi, tum
operi meo qualicunq; hono-
rificam

Epistola Dedicatoria.

rificam præfandi materiam)
edifferere. Enimyero id ip-
sum Tractatus à te jampri-
dem in lucem emissi plenissi-
mè loquuntur, nec alio tibi
opus futurum est præcone,
cujus subsidaria vox nominis
tui claritatem amplificare fa-
tagat. Quocirca tritis hisce
jamq; tralati iis præfandi ar-
gumentis ultrò repudiatis,
me Tractatum hunc ideò in
clientelam tuam dedisse pro-
fiteor, propterea quòd, quem-
admodum ego tuo suasu atq;
instinctu hanc provinciam
suscepi, ita etiam eorum quæ
hìc traduntur veritatem & ef-
ficaciam tute ipse, testis pla-
nè locupletissimus, experien-
tiâ aliquoties comprobata
conspexisti; dum ad illud

Epistola Dedicatoria.

obsequiū identidem descenderes (quæ tua & quidem egregia est humanitas) ut te-
met in adeundis ægris meis
comitem mihi adjungeres;
in qua sanè re benignum a-
nimi affectum ad honesta ut-
cunq; sese demittentem, vel
invito hujusce sæculi genio,
ostendisti.

Hanc itaq; tractatiunculam
ut benignè accipias & nomi-
nis tui splendore illustrare
digneris obnixè rogo ac ob-
testor; quæ etiamsi neq; mole
ampla, neq; spoliis Autho-
rum (quorum cineres per me
molliter cubent) sit sufferta,
tamen non erit, uti spero,
eo nomine tibi minus grata,
quippe qui inter magna quid
interfit & tumida non igno-
ras.

Præ-

Epistola Dedicatoria.

Præter Febrim hîc dispiciendam, & alii sunt morbi quamplurimi, de quibus, cùm ipsorum medela praxi minus idoneâ, atq; methodo, rationi (meæ saltem) adversanti niti videatur, me, quò fides tibi data liberetur, differuisse oportebat. Sed visum fuit, in ætate, quam subtiles potius speculationes quàm sincera praxis exercent delectantque, hujus opusculi fatum prius experiri, quàm plura temerè periclitari.

Quod superest, *Vir Excellentissime*, temeritatis, si quæ in hoc opere nuncupando admixta videbitur, veniâ impetratâ, nec non eximiis tuis erga me meritis gratissimè agnitis, hujus Epistolii insti-

Epistola Dedicatoria.

tuto factum est satis. Quan-
quam multiplici benevolen-
tiæ nomine tibi devinctus,
nunquam esse desinam

Exæ Tuæ

Servus obsequentissimus,

THO. SYDENHAM.

PRÆ-

PRÆFATIO.

Qui Medicinæ dat operam, hæc secum ut seriò perpendat oportet. Primò, se de ægrorum vitâ ipsius curæ commissâ rationem aliquando supremo Judici redditurum. Deinde, quicquid artis aut scientiæ Divino beneficio consecutus est, imprimis ad summi Numinis laudem atque humani generis salutem esse dirigendum; indignum autem esse ut cœlestia illa dona vel avaritiæ, vel ambitûs studio inserviant. Porro, se non ignobilis alicujus aut contemnendi animalis curam suscepisse. Ut enim humani generis pretium agnoscas, Unigenitus Dei filius

Præfatio.

lius homo factus est, adeoque naturam assumptam suâ dignatione nobilitavit. Deniq; nec se communi sorte exemptum esse, sed iisdem legibus mortalitatis, iisdem casibus & ærumnis obnoxium atq; expositum, quibus alii quilibet; quo diligentius & quidem tenerior cum affectu, ipse planè ὁμοιοπαθὴς, ægrotantibus opem ferre conetur.

Verùm nonnulli hisce cogitationibus minimè se regi patiuntur, id quod ex eorum praxi, ipsoq; vitæ genere satis manifestum est. Sive quòd fastu turgidi atq; scientiæ suæ opinionone inflati, ad minuta hæc (ut quidem illis videntur) non sine contemptu quodam negligentius descendant, susq; deq; habent.

Præfatio.

habentes quid de miseris mortalibus fiat, ipsorum curæ concreditis ; atq; interim de supremo Numine vel parum cogitantes vel illud forte vix agnoscere dignati : Sive quòd lucro prorsus intenti atq; inbian-tes, aut gloriolæ cupidine abrepti, eò tantùm spectant, ut di-tescant ipsi, aut nescio quam nominis famam consequantur. Quicquid sit Medicos omnes, qui quidem probos & pruden-tes haberi volunt & esse, illud agere oportet, ut bonitatem Di-vinam agnoscentes primò, mox etiam implorantes, ab ea sapi-entiam & prosperum rerum su-arum eventum expectent ; at-que porrò ut omni ope ac stu-dio illuc incumbant, quo non tantùm sanitatem agrotanti-bus,

Præfatio.

bus, verùm & Medicæ quam
profidentur arti certitudinem à-
liquanto majorem acquirant;
huc nimirum experimenta sua
dirigentes, ut medendi ratio
locupletior & luculentior indi-
es evadat, atq; adeo ut genus
humanum securius atque uni-
versalius illius beneficio per-
fruat, etiam postquam illi
fatis concesserint. Ego itaq;
officii mei conscius hanc me-
thodum curandi Febres propri-
is observationibus superstru-
ctam orbi trado. Quandoqui-
dem enim, Deo qualibuscun-
que conatibus meis aspirante,
visus mihi sum certio rem
quandam atq; magis genui-
nam Februm curandarum ra-
tionem quàm quæ vulgò obti-
net apprehendisse, rem gratam
veræ

Præfatio.

veræ Medicinæ studiosis me
præstiturum sum arbitratus,
si eandem publici juris face-
rem; id quod ego liberali a-
nimo & sincero affectu jam
aggredior: Methodum verò
quâ utor, etsi forte rationibus
minus solidis inniti ea non-
nullis videatur, experientiâ
tamen multiplici comprobata
esse certissimè scio ac pronun-
cio. Quamvis autem prævi-
deam extituros non paucos,
qui vel ex carpendi libidine,
vel superbiâ quâ cæteros om-
nes contemnere atq; aspernari
didicerunt, mihi vel novitatis
studium, ac forte etiam absur-
darum sententiarum patrocini-
um imputabunt, vel è contra-
rio (si forte praxin hanc ex-
perti, commodam illam esse cer-

Præfatio.

tamq; compererint) me nihil non vulgare sibiq; satis antea cognitum protulisse affirmabunt; haud tamen deterreri me passus sum, quo minùs ingenuis hominibus, & veri simul ac humani generis amanti- bus hasce paginas communica- rem. Mea enim indoles atque ingenium illud est, ut quid na- suti isti atque fastuosi dicant vel sentiant parum admodum sim sollicitus. Sapientibus au- tem & probis hoc dictum vo- lo, me quidem nihil omninò quoad rerum atq; experimento- rum veritatem imposuisse; om- nia candidè atq; ingennè elocu- tum. Neq; verò quicquam du- bito, quin ipsi aliquando peri- culum facientes, suos etiam calculos huic methodo adjectu-

Præfatio.

ri sint. Interim si quid in
Theoriâ erraverim, & veni-
am rogo, & melioribus judici-
is me cessurum polliceor; for-
tassis etiam sponte meâ alitèr
posthac de rebus hujusmodi co-
gitaturus. Sicut enim aliorum
erroribus non admodum suc-
censere soleo, ita nec libet me-
is pertinacitèr adhærere.

THE
JOURNAL
OF
THE
AMERICAN
MEDICAL
ASSOCIATION
PUBLISHED WEEKLY
CHICAGO, ILL.
1914

a
c
o
l
e
f
f
i
i



Sectio Prima.

D E

Febris Continuis.

QUænam à me in Februm
continuarum medelâ ob-
servata est methodus, quò
luculentiùs pateſcat, non
abs re futurum arbitror de Prin-
cipiis, è quibus Praxis nostra enas-
citur, pauca quædam præmittere.
Id quod eò libentiùs facio, ut pa-
lâm fiat Therapiam nostram non
esse prorsus Empiricè institutam,
sed ejusmodi quæ solidis rationum
fulcris innitatur, aut saltem nobis
inniti visa est.

I. Ac primò quidem adverto
inordinatam illam massæ sangui-
neæ

neæ commotionem Februm omnium seu causam, seu comitem, à naturâ concitari, vel ut heterogenea quædam materia in eâdem conclusa, ac ipsi inimica secernatur; vel ut sanguis in novam aliquam diathesin immutetur.

Atque in hoc negotio magis arridet latiùs & generalius *Commotionis* vocabulum, quàm vel *Fermentationis*, vel *Ebullitionis*; quippe quod inanis λογισμῆς occasionem præscindat, quam fortassis istiusmodi voces (quæ etiam si explicationem non incommodam admittant, tamen minùs propriæ, ac nonnihil duriores nonnullis videntur) haud satis caverent. Quamvis enim Cruoris in Febris *commotio*, liquorum vegetabilium aliàs *fermentationem*, aliàs etiam *ebullitionem* æmuletur; non desunt nihilominus qui eandem non uno modo ab utrâque plurimum differre arbitrantur. De *Fermentatione* unum alterúmve ab illis fumatur exemplum.

Primò,

Primò, licèt fermentefcentia liquida vinofam quandam indolem ita nanfcisci foleant, ut fpiritum ardentem ex iisdem deftillatio elicuat, atque in acetum facilè defciscant, quod ipfum infigni acore pollet, & fpiritum acidum deftillando exhibet; neutram tamen ejufmodi mutationem in fanguine hætenus obfervatam fuiſſe contendunt.

Deinde adverti volunt quòd cum in liquoribus vinofis *fermentatio* & *depuratio* eodem tempore peragantur, & quaſi paribus paſſibus procedant, *depuratio* tamen fanguinis in Febris ejufdem *aftuationem* non comitetur, fed confequatur, id quod in paroxyſmo febrili per fudores foluto, vel oculorum teſtimonio, patere exiſtimant.

Quod autem ad *Ebullitionem* attinet, difficilior illis hæc videtur analogia, quæque experientiam habet ſummoperè refragantem, in multis nimirum caſibus, quo-

De Febris Continuis.

ties non adeò effrænis est cruoris
orgasmus, ut *Ebullitionis* appella-
tionem mereri possit. Verùm utut
sit, (neque enim hisce controver-
siis me ullatenus immisceri pati-
ar;) quandoquidem *Fermentatio-
nis* & *Ebullitionis* vocabula apud
recentiores Medicos plurimùm
invaluerunt, ego quoque eadem
subinde usurpare non dubitave-
rim, dummodò ex jam dictis satis
constet voces istas in hoc Tractatu
clariori solummodò dicendorum
explicationi inservire.

Porro febrilem hanc sanguinis
commotionem ob materiæ cujus-
dam heterogeneæ, ipsique naturæ
adversantis, secretionem ab eadem
concitari, omne genus febrium
malignarum testatum facit; utpo-
te in quibus, istius ebullitionis
sanguinis beneficio, fit excretio
ad cutim excrementi in eodem la-
titantis, & prava qualitate affecti.

Quinimò nec, meâ quidem sen-
tentiâ, minùs liquet febrilem san-
guinis commotionem sæpè (ne di-
cam

cam sæpiùs) non aliò collineare, quàm ut ipse sese in novum quendam statum, & diathesin immutet, hominémque etiam, cui sanguis purus, & intaminatus perstat, febris corripi posse; sicuti in corporibus sanis evenire, frequenti observatione compertum est, in quibus nullus apparatus morbosus, vel quoad plethoram, vel quoad cacochymiam fuerit, nulla insalubris aëris anomalia, quæ febris occasionem subministraret. Nihilominus etiam hujusmodi homines, præcedente insigni aliqua aëris, victûs, cæterarumque rerum non naturalium (ut vocant) mutatione, identidèm febre corripiuntur; propterea quòd eorum sanguis novum statum, & conditionem adipisci gessit, qualem ejusmodi aër aut victus postulaverint; minimè verò quòd particularum vitiosarum in sanguine stabulantium irritatio, febri procreët. Et si nequaquam dubitem materiam in sanguinis despumati-

one post febrilem commotionem, solennitè excretam, vitiosam esse; quantumvis sanguis laudabilem antea diathesin obtinuerat: id quod vix magis mirandum est quàm quòd esculentorum portiones aliquot corruptæ, & fœtidæ evadant, postquam insignem in corpore alterationem subierint, ac jam à reliquis segregatæ fuerint.

II. Secundò ita mecum reputo, Indicationes veras, ac genuinas, quæ in hoc morbo consurgunt, in eo versari, ut sanguinis commotio intra modum naturæ proposito congruentem, sistatur; eâ nimirum ratione, ut nec hinc plus æquo gliscat, unde periculosa symptomata insequi solent, nec illinc nimium torpeat, quo pacto vel materiæ morbificæ prætrusio impediretur, vel sanguinis novum statum affectantis labefactarentur conatus. Adeò ut siue materiæ heterogeneæ irritanti, siue cruori res novas molienti febris ortus debeat, beatur,

beat, Indicatio utrobique eadem existat. Hisce positis fundamentis Therapiæ methodum hoc ritu instituo.

Quoties mihi cum ægris res est, quorum sanguis vel per se imbecillior existit (uti ferè in pueris) vel justâ spirituum copiâ destituitur (ut in decliviori ætate, atque etiam in juvenibus diuturno aliquo morbo confectis) à venæ-sectione manum tempero. Enimvero si phlebotomiam his imperarem, sanguis etiamnum citra ejusmodi imminutionem plus satis debilis, despumationi suæ obeundæ prorsus impar redderetur; unde totius massæ perversio, ac proinde forsitan ipsius ægri interitus sequeretur (quemadmodum si cerevisiæ aut aliûs cujusvis musti fermentatio intempestivè sistatur, liquores illi vitium plerumque contrahunt.) Quippe particularum, quas semel exterminare cœperit, quæque, tametsi dum reliquæ cruoris massæ æquabiliter immisce-

rentur, puræ extiterant, jam verò putredinem deterrimam acquirere, & cæteros humores gravi inquinamento inficere habiles evaserint, consortium natura ferre amplius non potest. Quanquam haud me latet ægros temeraria sanguinis missione mulctatos, convenientium Cardiacorum usu aliquando servari, sanguinémque ad tenorem defæcationi suæ peragenda idoneum restitui posse. Sed præstiterat plagam non infligi, quàm sanari.

Attamen ubi in contrariæ indolis sanguinem incido, qualis in juvenibus athletico habitu & temperamento sanguineo præditis reperiri consuevit, primum in curatione locum Phlebotomiæ attribuo; quæ (præterquam in casibus inferiùs memorandis) sine salutis periculo hîc omitti nequit. Nam aliàs non solùm præ nimia sanguinis ebullitione, Phrenitidum, Pleuritidum, aliarúmque id genus inflammationum periculum immineret,

immineret, sed præ copiâ etiam, impeditio omnimoda Circulationis, & totius massæ quasi strangulatus consequeretur.

Mensuram quod attinet, mihi solenne est eam duntaxat sanguinis quantitatem detrahere, quantum conjicere liceat, quæ ægrum ab incommodis quibus immodicam ejusdem commotionem obnoxiam esse diximus, incolumem præstet. Æstuationem verò illam deinceps rego ac moderor, Phlebotomiam vel repetendo, vel omittendo, Cardiacis calidis vel insistendo, vel parcendo, ac denique alvum vel laxando, vel compescendo, prout motum illum vel efferari, vel languescere animadverto.

Post Venæ-sectionem (siquidem ipsa juxta casus præmemoratos necessaria fuerit) sollicitus sedulûsque inquirō nunquid ægrum vel vomitus, vel inanis aliqua vomendi propensio sub Febris initium interturbaverit. Id si contigerit omninò medicamen Emeticum

ticum præscribo, nisi vel ætas tenella, vel insignis aliqua debilitas ægri ab eo temperandum suaserit. Sanè Vomitorium propinare, ubi istiusmodi prægressa est vomendi proclivitas, adeò est necessarium, ut nisi humor ille expellatur, in sentinam complurium malorum difficilium sit abiturus, quæ crucem figent Medico toto durante medicationis tempore, ægrumque in haud leve periculum conjicient. Ex horum præcipuis, & maximè solitis est *Diarrhæa*; quæ ut plurimum in defervescentiâ Febris consequitur, quotiescunque Emetica, quando ea suadebat indicatio, omissa fuere. In febris quippe progressu, ubi malignum in ventriculo humorem nonnihil subegerit Natura, & ad intestina amandaverit, illa ab acri humore ex hoc in stomacho fonte perpetim scaturiente usque adeò corroditur, ut non possit non insequi *Diarrhæa*.

Observavi nihilominus in Febris

bribus quæ ineunte Vere grassantur, omissionem Vomitorii, tametsi talis vomendi propensio præcesserit *Diarrhæam* necessariò non inferre; quam tamen aliâ quâvis anni tempestate infert; proindeque tunc temporis non adeò necessarium, etiamsi valde proficuum esse Emetici usum arbitror.

Jam autem in eo versatur istiusmodi *Diarrhææ* periculum, quòd æger satis jam morbo debilitatus, enervatur ulteriùs, & præterea (id quod majoris est in ipsius noxam momenti) in febris declinatione, quo tempore contrahere se sanguis, ac vim suam exercere debebat ad despumationis officium peragendum, penitus præpeditur hâc emissionem.

Jam verò nequid dubites humorem hunc in ventriculo nidulantem, nisi fortè vomitu eliminetur, hanc Tragœdiam (*Diarrhæam* dico) quasi ex insidiis aliquantò post daturum, inquisitione institutâ, nunquam ferè non comperies,

comperies, siquando febrim *Diarrhæa* comitetur, ægrum in morbi principio in vomitum proclivem fuisse, nec tamen Emeticum fuisse propinatum. Porro etiam compertum habebis etiam si proclivitas illa ad vomendum jam pridem præterierit, *Diarrhæam* tamen quamprimùm Vomitorium exhibueris plerumque cessaturam; dummodo Emetico ferendo pares fuerint ægri vires: Sæpius autem observavi *Diarrhæâ* semel abortâ, medicamenta adstringentia vel nihil omninò, vel parùm admodum ad eandem sistendam conferre, sive intro-sumpta, sive exterius applicata.

Emeticum quale passim à me propinatur hujusmodi ferè est. *Rec. Infus. Croc. Metall. 3vj. Oxy-mel. Scillit. & Syr. Scabios. comp. āa. 3ss. M. F. Emet.* Quod hauriri jubeo tempore pomeridiano, duabus horis post leve prandium. Verùm quò tutius, ac felicius vomitio subsequutura succedat, illud etiam

etiam in mandatis habetur, ut *Zythogalæ* ℥b vj, vel viij. sint in promptu, quippe quòd periculosa sint ista medicamenta nisi copiosè diluantur: Ideoque quoties vomuerit æger, aut alvum exoneraverit, è vestigio sumendus erit haustus: quo factò, & inania illa tormina præcaventur, & vomendi conatus auspiciatò procedunt.

Sæpe miratus sum dum fortè materiam vomitu rejectam aliquando curiosè contemplabar, eamque nèque mole valde spectabilem, nec pravis qualitatibus insignem, quì factum fuerit ut ægri tantum levaminis exinde senserint. Nempe vomitu peractò, sæva illa symptomata (nausea v.c. anxietas, jactationes, suspiria luctuosa, linguæ nigredo, &c.) quæ & ipsos excruciant, & adstantes perterrefecerant, mitigari solent ac solvi, quòdque morbi reliquum est *subitus* tolerari.

Illud hîc loci non omittendum erit, Si ægri conditio utrumque auxilium

auxilium postulaverit (Venæ-sectionem intelligo, & Vomitorium) rutum omninò esse, ut Venæsectio, Emetici exhibitionem præcedat; aliàs enim dum vasa sanguine distenta sunt, periculum imminet ne ex violentis illis vomendi conatibus vel rumpantur vasa pulmonum, vel Cerebrum lædatur, affuso cum impetu sanguine atque effuso, adeoque æger Apoplexiâ correptus pereat. Cujus rei quamvis historias aliquot commemorare possim, illis tamen hîc supersedere visum est, monuisse contentus maximâ hâc in re cautelâ utendum esse.

Siquis autem quærat, quo tempore Febris Vomitorium exhiberi velim; dico, In ipso planè febris initio, siquidem optio daretur, Emeticum propinarem: ita enim fiet, ut ab horrendis illis symptomatibus, ex humorum in ventriculo, locisque vicinis delitescentium illuvie ortum ducentibus, ægrum præmuniamus; imò verè & fortasse

tasse in ipsis quasi in cunabulis opprimamus morbum, qui aliàs cum ægroti periculo grandescet, ac longævus evadet: nutritus nimirum dictis illis humoribus, qui vel substantiâ suâ in penitiores corporis partes transmissi cum sanguinis massâ commiscuntur, vel ex ipsâ morâ peiores facti, atque venenatâ pravitate inquinati, ex foco suo jugiter pertranseunti sanguini malignam auram afflabunt. Hujus rei (ne longiùs abeamus) Cholera morbus exemplum nobis exhibet; fit enim aliquando ut intempestivâ operâ vomitum in illo morbo cohibere satagentes (sive illud Laudano fiat, sive adstringentibus medicamentis) eo cohibito non minùs periculosam malorum catervam invehant. Humores enim acres corruptique, quorum exclusionem tantispermittere oportuerat ut satis evacuarentur, hoc pacto repulsi, vires suas, ac sævitiam in sanguine exercent, febrémque accendunt, quæ

quæ ut mali moris, & gravibus symptomatis stipata esse solet, ita nisi propinato Emetico, tolli vix poterit, etiam ægro jam ne quidem vomituri.

Quòd si nobis (ut sæpe fit) serò accersitis non licuerit Emeticum propinando, ægrorum salutem sub febris initium consulere; certè tamen convenire existimaverim ut quovis morbi tempore illud fiat, modò vires eo usque morbus non attriverit, ut Emetici vim ferre jam ampliùs nequeant. Equidem ego die febris duodecimo vomitum imperare non dubitavi, etiam cum æger vomiturire desiisset, neque sine fructu: Eo namque Diarrhæam sustuli, quæ sanguinem in peragendâ despumatione impedivit; quin & seriùs idem facere minimè dubitarem, nisi virium attritarum ratio prohiberet.

Vesper, celebrata jam vomitione, semper illud ago ut tumultum ab Emetico in humoribus excitatum consopiam, & quietem conciliem;

conciliem; ideóque sub noctem,
 vel horá somni Paregoricum
 quempiam haustum exhibere ju-
 beo. Ex. gr. *Rec. Aq papav. rhæad.*
ʒij. aq. mirab. & syr. de mecon. āa
ʒiij. syr. papav. errat. ʒss. M. F.
Hauftus.

At si vel ob copiosam sanguinis
 jacturam, quam curationis decur-
 su passus est æger, vel ex vomendi
 frequentia, dejectionibúsque in
 Emetici hujus usu factis, vel ex
 præsentí ejusdem ἀνρυξις, vel ex
 debilitate ejus, vel ex Febris jam
 declinantis vetustate, nullum jam
 supersit in posterum concitandæ
 nimiae Ebullitionis periculum,
 tum metu procul habito, vice
 haustus præscripti, Diascordii sa-
 tis largam dosin vel impermixti,
 vel aquæ alicui Cardiacæ sociati
 exhiberi jubeo. Præclarum sanè
 Medicamentum, modò eâ quan-
 titate exhibueris, quæ remedii
 potiùs quam tituli mensuram im-
 pleat.

Hic autem loci, priusquam de
 C Emeticis

Emeticis dicendi finem faciam, prætereundum non est, omninò tutum non esse Vomitoria ex infus. Croc. Metall. parata puerulis, ullisve infra adolenscentiam constitutis; vel minimâ quantitate exhibere. Optarem equidem ut illius loco alia nobis tutiora, sed satis interim efficacia suppetent, quæ humorem hunc, in febris declinatione, ferè semper, nisi fortè verno tempore, Diarrhæam minitantem, radicitus extirpare possit; vel saltem ut medicamento aliquo idoneo acrem istam materiam, ejusque vim corrosivam ita mutare liceret, ac retexere, ut commovere Diarrhæam nequiret. Sæpiùs profectò mihi molestum illud accidit, quòd ad infantes, puerosque febre correptos, accersitus, indicationem conspexi, quæ quidem medicamenti usum suasit, cujus ope extrà periculum collocari potuissent, quod tamen exhibere, veritus infelicem exitum, non sum ausus. Verùm
in

n adultis nullam inde noxam
hactenus observavi, modò cum
cautionibus prædictis Emeticum
propinetur.

Vomendi exantlato negotio,
illud mecum ulteriùs disquirere
soleo, utrum evacuationibus præ-
gressis non obstantibus, sanguis
etiamnum adeò exæstuet, ut illius
effervescentiæ limites adhuc po-
nendi sint, ac sufflumen adden-
dum, an verò eò usque elangue-
rit ut indigeat incitamento; vel
denique, an Fermentatio ad gra-
dum idoneum, ac debitum redu-
cta permitti sibi absque ægri peri-
culo possit. De horum singulis
nonnulla mihi dicenda sunt.

I. Itaque si sanguis eò usque
exæstuet ut meritò adhuc suspi-
cari liceat, ægrum vel Phrenitidi,
vel alii alicui molesto symptomati,
ex nimia sanguinis ebullitione
prognato, obnoxium esse, postri-
diè Emetici exhibiti *Enema* præ-
scribo, idémq; repeti, pro re na-
tâ jubeo; quo sæpe fit ut sanguine

nonnihil ventilato, refrigeratq;
illius effervescentia satis compes-
catur. Interdum tamen usu venit,
ut Venæ-sectionem etiam semel
adhuc atque iterum repetere ne-
cesse sit, nempe in temperamen-
tis admodum sanguineis, & ætate
florentibus, aut in iis qui nimio
vini usu, inflammatoriam quan-
dam diathesin sanguini suo im-
presserunt. Verùm plerumque
tanto, tamque insigni remedio
(quale quidem est repetita Venæ-
sectio) non opus est; ac proinde,
si prædictos casus exceperis, effe-
vescentiam illam Enematum ad-
miniculo satis reprimemus. Qua-
re si sanguis nimium æstuet, atque
efferveſcat, alternis diebus Clyste-
rem injici jubeo, idque ita fieri
ad decimum usque morbi diem
vel circiter. Veruntamen si magna
vis sanguinis missa fuerit, vel
æger sit ætate provectâ, tunc tem-
poris Enemata nulla impero, eti-
am si sanguis multum effervuerit.
In his etenim casibus, uti metu-
endum

endum non est, ne omissis Clysteribus, ebullitio concepta eò usque procedat, ut insignis alicujus, & infesti symptomatis periculum immineat ; ita certissimum est, eorundem usu sanguinis robur, ac vim, atque (ut ita dicam, etsi minus propriè) tonum relaxari, eatenus quidem ut, in senibus præcipuè (neque enim illis Enemata tam prosperè ac juvenibus cedere solent) Naturæ opus interturbetur, atque impediatur. Quod si vena secta quidem fuerit, sed non multum sanguinis emissum, tunc, uti dixi, Clysteres adusque decimam plus minus diem impero ; nonnunquam etiam adusque duodecimam ; quod in illis præsertim obtinet, quibus sanguinem demere non audeo. Sunt enim, qui post Intermittentes Autumnales (sive Tertianæ fuerint illæ, sive Quartanæ) febribus continuis, ex purgationis, in præcedentis morbi fine, defectu, corripuntur ; His si sanguinem miseris, periculum

lum est, ne sedimentum illud, quod prægressa fermentatio deposuerat, in massam sanguineam resorbeatur, novæque turbas excitet: Venæ-sectionis itaque loco, rebus ita se habentibus, Clysteribus utor, & quidem ad diem usque duodecimum, modò æger sit juvenis, atque fermentatio nimis exaltata.

2. Verùm è contrario, si Venæ-sectionem adhibueris, si omiseris, si sanguinis effervescentia nimis elanguescat, adeoque stimulo egeat, ne Naturæ juvandæ impar fuerit; tunc equidem à Clysteribus etiam ante diem decimum, multoque magis eo præterlapso, prorsus abstinendum arbitror. Quorsum enim jacentem jam, & nimis elanguidam fermentationem ulteriùs compescere atque reprimere conaremur? Quod si verò post tempus illud, in morbi nempe declinatione, Clysteribus utaris, profectò non minùs absolum id fuerit, atque ab omni
ratione

ratione alienum, quàm si quis effervescenti Cerevisiæ nimis amplum spiraculum aperuerit : Etenim aperto illo spiraculo præpeditur Natura, quo minùs ad morbificæ materiæ separationem unitis viribus incumbat. Postquam igitur vel mediantibus evacuationibus idoneis, atque opportunis, æger *ἔξω βαλὼν* positus fuerit, quantum ad illa symptomata attinet quæ ex nimia ebullitione nascuntur, vel morbus jam declinaverit ; quantò magis astrictam illi alvum præstitero, tantò magis eum extra periculi aleam colloco: nempe febrili materiâ ad sui concoctionem suaviter, ac blandè propendente. Quocirca si præcedentes evacuationes, sanguineæ massæ quasi laxitatem quandam induxerint, vel inducereminentur, vel æger ante debitum tempus febre levatus fuerit, vel etiam febris ad ultimam suam periodum pervenerit, non solum Enemata procul haberi volo, sed

& Cardiacorum opem atque auxilium suggerendum arbitror, atque mox ad alvum adstringendam memet accingo.

Cardiaca verò quod spectat, quoniam usu mihi compertum est, eadem properè nimis exhibita non contemnendam noxam inferre (crudâ scilicet adhuc existente materiâ, venâque nondum sectâ, metuendum est ne in Cerebri membranas, aut pleuram decumbat) ideo curæ mihi semper est, ne *Cardiaca* exhibeantur, dummodo vel nihil omninò, vel parùm sanguinis emissum, nullâq; alia insignior evacuatio facta fuerit, aut æger ætatis vigorem nondum exegerit; neque enim video, quorsum sanguis ejus per se satis locuples, ulterius in ipsius perniciem ditesceret: Locuples autem atque opulentus satis est, neque succendiculis eget, quamdiù evacuationes insignes calorem ejus insitum non prostraverint. Hujusmodi ægris domi nascuntur
Cardiaca,

Cardiaca, & quæ foris adduntur, aut frustranea sunt, aut etiam damnosa: quapropter ego vel nulla omninò, vel saltem levissima, permiserim. Interim verò si æger ex profusis evacuationibus lassus & languidus, vel ætate fuerit provectus, solenne mihi est, Cardiaca vel in ipso febris initio propinare: Morbi autem die duodecimo, negotio tunc temporis ad secretionem vergente, medicamentis calidioribus liberaliùs indulgendum censeo; (imò paulò maturiùs idem fieri potest, modò non metuendum sit, ne febrilis materia in partes principes præceps agatur;) Namque hoc tempore quò magis calefecerim, eò magis concoctionem acceleravero. Neque reverà cogitando assequi possum, quid sibi velint Medici, cùm sua præcepta toties ingeminant, de remediis ad promovendam febrilis materiæ concoctionem administrandis, id quod in morbi initio accersiti sæpe faciunt: nihilominus

hilominus tamen eodem ipso tempore medicamenta ejusmodi imperare non dubitant, quæ febrim scilicet attemperare possint. Profectò enim est Febris ipsa Naturæ instrumentum, quo partes impuras à puris secernat : hoc illa modo plane imperceptibili præstat ab initio, atque etiam in *acutissim* morbi, verùm in ejusdem declinatione apertius, atque manifestius idem opus aggreditur, id quod ex urinâ cernere licet. Materiæ febrilis *concoctio* nihil aliud revera significat, quàm peccantis materiæ à sanâ separationem. Hanc igitur ut acceleres, non satagendum nescio quibus, attemperantibus, sed Febris effervescentia tamdiu permittenda est, quamdiu salus ægrorum passa fuerit ; cum autem finem spectat, atque declinationem, secretionem jam conspicuâ, tunc quidem calidioribus medicamentis illam à tergo insequemur, ad rem eo celerius ac certius perficiendam. Atque hoc
reipsa

re ipsa est, febrilis materiæ concoctionem promovere; cum evacuationes, & refrigerantia moras neſtant, & curationem impediunt, ipsamque sanitatem jam appropinquantem abigunt, uti sæpius à me fuit observatum.

Si fermentatio satis progrediat, despumatio circa diem decimum quartum peragetur: Verùm si refrigerantia quælibet seriùs adhibueris, atque ita eorum ope effervescentia sufflaminetur, mirum non est, si febris ad diem viceſimum primum, quin & in effectis corporibus malè tractatis multo longiùs excurrat.

Illud porro observatu dignum est, quandoque accidere, ut æger Clyſterum, aliorumve catharicorum usu circa declinationem morbi intempeſtivè præſcriptorum, parùm alleviari videatur, imò nonnunquam apyrexia omnimodâ frui, poſt diem autem unum alterumve ſenties, non tam priſtinam febrim vires ſuas redintegrare,

se, quàm novam accendi : rigor nimirum, atque horror subito invadet, quem mox excipiet calor atque febris, idem stadium (nisi forsan in intermittentium classem se reponat) decursura, quod in præcedentibus monstratum fuit. Cum ita se res habeat, non aliter tractandus est æger, quàm si antea febre non detentus fuisset, verùm quoad res agendas calcata jam vestigia repetenda : despumatio enim, quæ cœptæ jam ebullitioni debetur, non nisi prædicti temporis, scilicet 14 dierum spatio peragetur, utcumque molestum fuerit ægro, à prægresso morbo satis jam debilitato, eousque sanitatem expectare.

Cardiaca, quæ adhibeo, passim sunt ejusmodi, quæ statim subindicabo, quorum *moderatio*ribus utor in morbi principio, æstuatione maximè fervente ; gradatim ad usum calidiorum, juxta morbi progressum, vel ebullitionis gradus pergens ; semper memor licere,

licere, siquidem multum sanguinis missum, vel æger senex fuerit, ut Cardiaca fortiora administrentur, quàm cum vel nulla præcesserit Venæ-sectio, vel æger ætate floruerit.

Moderata autem illa quæ dixi, Cardiaca fiunt ex aquis stillatitiis (*verb. gr.*) Borag. Citr. Scord. compos. fragor. Theriacal. cum admixtis Syrup. Melissophyll. Fernel. Caryophyll. & de succo Citr.&c. *fortiora* verò ex pulver. è Chel. Canor. Comp. Bezoar. Confect. de Hyacinth. Theriac. Androm. aliisque ejusdem indolis. Quæ sequuntur in frequenti usu sunt.

Rec. Aq. borag. citri, scordii compos. & terasor. nigr. āa ʒij. aq. cinamoni hordeati ʒj. margarit. preparat. ʒij. sacchari cristallini ʒjss. Misce. sumat cochl. iiij. sæpius in die, præcipue in languoribus.

Rec. Aq. totius citri, & fragor. āa ʒiiij. aq. cord. frig. Saxon. ʒi. aq. theriac.

De Febris Continuis.

theriac. stillat. syr. melissophyl. Fernel. Caryophill. & de succo citri āa ʒss. Misce, f. Julapium, de quo capiat sæpius.

Rec. Pulv. è chelis. cancrorum compos. lap. bezoardici Oriental. & Occidental. contrayervæ āa ʒj. sol. auri n. j. Misce, f. pulvis subtilissimus : Capiat ad quant. gr. xij. quoties opus fuerit ; ex syr. è succo citri, caryophill. āa ʒij. superbibendo cochl. aliquot Julap. præscript.

Rec. Aq. theriac. stillat. ʒiiij. semin. citri ʒij. contundantur simul & f. Emulsio. Colaturæ adde sacchari perlati q. s. ad gratum saporem. sumat cochl. ij. ter in die.

Plures verò formulas recensere supervacaneum arbitror, quoniam & innumeræ sunt aut esse saltem possunt, & in morbi decursu juxta varia ejus tempora, ac diversa symptomata, variandæ sunt.

3. At si Fermentatio neque nimium æstuet ; neque langueat, eam

eam in isto gradu relinquo, nec ullis remediis utor, nisi ægrorum vel amicorum, quibus stipantur, importunitas à me aliquid extorqueat, quod ipsis citra instituti, & scopi mei fraudem placeat.

Atque hoc loco non prætermittam, me sapius ad *tenuis conditionis homines*, quorum crumena prolixo apparatur Medico ferendo non erat, accersitum, nil fecisse aliud post Venæ-sectionem, & vomitionem (siquidem eas postulasset indicatio) peractam nisi quod ipsis præscriberem, ut toto morbi tempore lecto defixi, non nisi juscula avenacea, & hordeacea vel similia haurirent; tenuem cerevisiam (dempto frigore) moderatè biberent ad sitim sedandam; & versùs febris finem, coeptâ jam separatione, siquidem segnior esset, ad eam juvandam fortiorem subinde potum, Cardiacorum loco, bibere ipsis permisi: Atque ita sine ulteriore aliquo apparatu, nisi quod leve Catharticum

tharticum in fine morbi addere soleam, eos salvos, & incolumes dimisi.

Sed ut ad institutum meum revertar, si prædicta methodus sollicite observata fuerit, usitatò circa 15 diem ex laudabilis in Urinâ separationis signo; tum etiam ex manifestâ omnium symptomatum remissione percipio, tempestivum tunc esse potionem purgantem exhibere, quæ sedimentũ è prægressa fermentatione hic illic depositum subducatur; quod nisi tempestivè factum fuerit, periculum est, ne in sanguinis massam remigret; ejusdemque febris recidivam conciliet; vel etiam suâ in partibus naturalibus, ad quas amandatum fuit, morâ, in mineram, tenacium deinceps in corpore malorum feracem abeat. Nimirum, separatione jam factâ, humores crassi ac impuri ex arteriis sanguini in venis refluxo, immixti, regressum ejus facile impediunt, ex quo varia obstructionum, ac fermentorum genera nascuntur. Ubi

Ubi tamen animadvertendum, non adeò planè necessarium esse post febres Vernales, atque post Autumnales purgationem celebrare; idque propterea quod sedimentum à Vernalibus depositum tum copiâ, tum qualitate terrea, malignâque ab Autumnali superetur. Quod ipsum etiam in Variolis obtinet, multisque morbis aliis Verno tempore grassantibus, in quibus Purgantium omisso non tam grave periculum (quod ego quidem observaverim) quàm in casibus prius memoratis, inferre solet.

Et sanè non multùm is veritatis transiliret limites, qui affirmaret ab hoc capite (purgandi scilicet post morbos Autumnales ommissione) plurium morborum colluviem, quàm ab ullo alio, quo demumcunque causarum fonte, dependere.

Si valdè debilis sit æger, vel alioquin perfecta adeò depuratio facta non fuerit, ut audacter pos-

D

sim

sim purgans exhibere die decimo quinto, rem differo ad decimam septimam; quo tempore sequentem, vel similem, pro ratione ægri virium, potionem propino. *Rec. Thamarind. ʒss. fol. sennæ ʒij. rhabarb. ʒiss. Coq. s. q. aq. Colaturæ ʒiij. dissolve manna & syr. rosac. āa ʒj. Misce f. potio cap. mane.*

Purgatione peractâ, ægrum, hæctenus lecto, ex præscripto meo, defixum, surgere, & paulatim ad pristinam victûs rationem reverti jubeo. Ea quippe, quam ad hoc usque tempus præscripsi, eadem propemodum est cum illâ quàm modò commemorabam; uti juscula avenacea, & hordeacea; panatellæ ex pane & vitello ovi, in aquâ cum saccharo confectæ; juscula tenuia ex decocto pulli; Cerevisia tenuis lupulata, cui quandoque æstuante ardore febrili, immisceri potest succus Aurantiorum recens expressus, & super ignem ad cruditatis tantummodo sublationem coctus; & his similia;

similia; quamvis juscula Avenacea sint instar omnium. Negare verò cerevisiam tenuem, quæ subinde in mediocri quantitate sumatur, severitas est minimè necessaria, imò sæpenumerò etiam detrimentosa.

Ad *Epispastica* quod attinet, quæ tam crebri usus sunt, præterquam quod non videam, quâ ratione istum in partibus musculosis, quibus illa hærent, ichorem evacuando, ullatenus valeant sanguinem ab ista febrili materiâ, quæ ipsum commovebat, liberare; ægro potius molestiam ac dolorem ex cutis vulnere facessunt, eumque nimis jam morbo suo cruciatum ulterius divexant. Neque, licet iis ego sæpe usus sim, sic ut benè se habuerint ægri, inferre possum, ipsa aliquid prodesse; inque eam planè suspicionem propendeo, ægrum haud majori jure vesicatoriis istis, quàm plumeo lecto, sanitatis suæ restitutionem debere. Nempe sæpenumero inefficax medicamentum fortuna nobilitat.

Accidit interdum (maximè in senibus) ægrum febrî jam curatâ, & corpore satis jam superque purgato, nihilominus valde debilem esse; & quandoque tussi, interdum etiam screatu, magnam glutinosi, viscosique phlegmatis copiam expectorare: quod symptoma non tantum ægro terrorem injecit, sed & ipsi Medico, præsertim minus cauto, imposuit, eumque in opinionem induxit, quasi affectus iste Phthisi viam sterne-
ret; licet observaverim ego, rem adeò periculosam non esse. Hoc in casu ægrum jubeo Vinum Malaganum annosum, vel Falernum, sive Muscatum, cum pane tosto ei immisso, bibere; quod crasin multum prægressâ aestuatione sanguinis debilitati (proindeque nuper-ingestorum succis assimilandis imparis) corroborans, symptoma illud paucorum admodum dierum spatio abigit, ut crebrâ experientiâ mihi constat.

Hâc ipsâ, quam proposuimus
ratione,

ratione, ægrum à multis affectibus, symptomatísque, quæ malignitati tribui solent, tutum præstabimus; cùm nihil magis solitum sit Medicis in arte suâ minùs exercitatis, quàm, quando medicamentis nimis refrigerantibus, vel usu Enematum intempestivo, crasin sanguinis ita relaxârint, Naturámque in perficiendâ sanguinis depuratione adeò debilitarint, ut animi deliquia, aliáque symptomata (quæ genuina sunt ejusmodi impedimentorum arte positorum effecta) contingant, *malignitati* culpam transcribere: at si diuturnitas in quam abierit morbus, eum ab hoc vitio vindicet, tum quicquid eos in medelâ deinceps fatigat, id *Scorbuto* acceptum referunt: quamvis reipsâ neque symptomata, quæ accidebant, quamdiu vigeat morbus, *malignitatis* erant effecta, neque ea, quæ contigerunt in declinatione ejus, *Scorbuti*, sed utrumque rei malè gestæ debetur, quemadmodum

crebrò id à me observatum est.

Non quod ego, aut quisquam alius, qui Morborum historiam vel delibaverit, nescius esse possit, Febres esse, quæ non intemperie solâ, aut putrido tantùm calore, sed etiam malignâ & venenatâ qualitate (cujus signa evidentissima in ægris non possunt non apparere) constent: vel etiam quod inficias eam, complicari aliquando cum Febre *Scorbutum* & complures alios morbos posse; hoc tantùm dico, has affectiones immeritò sæpe in litem vocari.

Si fermentatio sanguinis ritè processerit, fiet omnino materiæ morbificæ despumatio intra tempus modo dictum. At si remedia refrigerantia, vel Enemata seriùs exhibita fuerint multo longiùs excurret febris, præcipue in hominibus grandævus, malè à medico curatis; ad quos quandoque accersitus, postquam febri per quadraginta dies & ampliùs laboraverant, nihil non expertus fui quo despu-

despumationem sanguini inducerem: sed nempe usque adeo debilitatus erat sanguis, partim senio, partim enematibus, & medicamentis refrigerantibus, ut neque Cardiacis, neque ullis aliis corroborantibus remediis scopum meum assequi possem; sed vel illorum Febris, virium suarum tenax permanebat, vel alioqui, si adesse videretur ἀπυρεξία, vires ægrorum admodum prostratæ erant, & tantum non emortuæ.

Aliorum autem remediorum successu frustratus, aliò consilium vertere sæpe coactus fui, cum successu non vulgari; nempe adolescentulorum vivum vegetumque calorem ægris applicando. Nec est quod quis multum miretur, hanc methodo, licet inusitatâ, ægrum tantopere corroborari, naturamque debilitatam juvari, ut semet à materiæ secernendæ, eliminandæque reliquiis exoneret; cum proclive sit intelligere, insignem effluviorum vegetorum

copiam à sano, & athletico corpore in corpus ægri exhaustum transfundi. Neque unquam comperi iteratam calentium linteorum applicationem ullatenus id præstare valuisse, quod modò præscripta methodus præstitit; ubi calor applicatus tum magis est humano corpori congener, tum simul blandus, humidus, æqualis, perennisque. Atque hæc ratio, spiritus, & halitus, forsitan Balsamicos, in ægri corpus immitendi, ex eo quo ipse illam adhibui tempore, licèt aliena primum videretur, ab aliis cum successu sælici fuit adhibita: neque profectò me pudet hujus remedii meminisse, tametsi petulci quidam homines, atque arrogantes, omniaque vulgaria ingenti supercilio contemnentes, me forsitan hoc ipso nomine aspernabuntur. Ego enim proximi mei commodum, ac salutem vanis illorum opinionibus longe anteferebam censeo.

Praxis hæcenus commemorata

nonnisi febres continuas spectat in genere ; At in medelâ febrium, diversitas, quæ ex differentibus ejusdem anni tempestatibus, atque etiam ex unius anni ab alio discrimine suboritur, me quidem judice non minus animadversione digna est, quàm ea quæ nascitur ex variis ægrotorum temperamentis. Et sane inter præcipuas causas, cur febrium medela usque adeo fluctuet, virorûmque etiam doctorum conatus tam malè cedant, hanc enumerandam existimaverim ; quod Practici observationes suas, quas ex sælici unius pluriumve febrium, in hac vel illa anni tempestate, curatione instituerunt, febrium omnium, in quavis tempestate, vel quovis anno, medelæ solent accommodare : id quod æquè periculosum judico, ac si medicus diversas ægrotorum temperies, singulis peculiariter, non respiciat, sed eandem omnibus in eodem morbo medicinam promiscuè exhibeat.

Primum.

copiam à sano, & athletico corpore in corpus ægri exhaustum transfundi. Neque unquam comperi iteratam calentium linteorum applicationem ullatenus id præstare valuisse, quod modò præscripta methodus præstitit; ubi calor applicatus tum magis est humano corpori congener, tum simul blandus, humidus, æqualis, perennisque. Atque hæc ratio, spiritus, & halitus, forsitan Balsamicos, in ægri corpus immitendi, ex eo quo ipse illam adhibui tempore, licet aliena primum videretur, ab aliis cum successu sælici fuit adhibita: neque profectò me pudet hujus remedii meminisse, tametsi petulci quidam homines, atque arrogantes, omniaque vulgaria ingenti supercilio contemnentes, me forsitan hoc ipso nomine aspernabuntur. Ego enim proximi mei commodum, ac salutem vanis illorum opinionibus longe anteferendam censeo.

Praxis hæcenus commemorata

nonnisi febres continuas spectat in genere ; At in medelâ febrium, diversitas, quæ ex differentibus ejusdem anni tempestatibus, atque etiam ex unius anni ab alio discrimine suboritur, me quidem judice non minus animadversione digna est, quàm ea quæ nascitur ex variis ægrotorum temperamentis. Et sane inter præcipuas causas, cur febrium medela usque adeo fluctuet, virorumque etiam doctorum conatus tam malè cedant, hanc enumerandam existimaverim ; quod Practici observationes suas, quas ex sælici unius pluriumve febrium, in hac vel illa anni tempestate, curatione instituerunt, febrium omnium, in quavis tempestate, vel quovis anno, medelæ solent accommodare : id quod æquè periculosum judico, ac si medicus diversas ægrotorum temperies, singulis peculiariter, non respiciat, sed eandem omnibus in eodem morbo medicinam promiscuè exhibeat.

Primum.

Primum, ut de variantibus mendi rationibus, quæ diversarum anni tempestatum febribus sunt accommodæ, differam : expendendum est, licet alia aliundè inter febres discrimina concedi possint, eas tamen præcipuè secundum subjectam materiam, cui febrilis inhæret commotio, discrepare ; istam verò materiam secundum diversam sanguinis diathesin, prout ea ab hac vel illa anni tempestate inducitur, discrimen suum nancisci. Ea quippe febrilis commotio, quæ tempore *verno* contingit, in sanguine nascitur, omnibus suis spiritibus vegeto ; *autumnalis* verò in sanguine, à prægressæ ætatis calore, ejusque vi, atque effectibus ad pauperiem redacta. Ac prout accidit, febrem pro duarum istarum tempestatum viciniâ, vel distantia, sanguinem invadere, ita morbus magis vel minus de fermentationis, ad hanc vel illam pertinentis, naturâ participat. Hisce consensanea

tanea sunt, quæ in praxi nostrâ observamus, nempe, *cæteris paribus*, febres autumnales magis esse periculosas, pejorisque notæ symptomatibus stipari, quàm vernaes; cùm decocti sint atque absumpti magis in sanguine spiritus, autumnali tempore, quàm verno: quæ causarum una esse videtur, quòd evacuationes, maximè sanguinis (qui non modò spirituum vehiculum est, sed & penu) adeò sint in autumno damnosæ, quamvis prodesset soleant tempore verno.

Atque forsàn ab illa degeneratione, quæ sanguini crebrò in febribus autumnalibus, præcipuè ex præmemoratâ spirituum pauperie, accidit, sæpius venenata illa nascitur sanguinis qualitas, quæ non modò ista mali moris symptomata febrim comitantia, sed nonnunquam etiam febrim ipsam progignit: natura quippe vehementer ab ea irritata contra ipsam insurgit, neque alio consilio novam hanc ebullitionem auspicatur, quàm

quàm ut malignitatem dictam eliminet : unde potius incumbet medico, illam alexipharmacorum ope expugnare, quàm evacuationibus, & medicamentis refrigerantibus feбри resistere, quam videtur in aciem produxisse natura ad venenatam perniciem debellandam. Insigne hanc in rem exemplum suppetit in peste, quæ feбри destituta multo est periculosior, quàm si eandem haberet comitem. Et sane quævis malignitas, quæ sanguinem adurit, si ipse ex se non valet ciere ebullitionem, vel, siquidem valet, impeditur quo minus id præstet, necessario vel lethalem, vel diuturnum morbum reddit : *lethalem* quidem, quando illa totâ substantiâ contraria naturæ, humanam temperiem abditâ proprietate corrumpit, destruitque : *diuturnum* vero, quando, licet naturâ suâ, & occultâ agendi ratione apta sit corpori magnopere nocere, illudque sensim conterere, subitò tamen

men hominem interficiendi vim non habet. Interim malignitatem aliquam, quæ aliàs ex pravitatē suâ necessariò mortem infert, esse posse salutarem, ubi sanguinis datur ebullitio ad eam eliminandam, pestis ipsa aliquando testatum facit. At ubi nulla est ejusmodi ebullitio; ad illam universim, & quaquaversum expellendam, ibi proinde morbum diuturnum reddi, itidè patet in Scorbutò, Lue venereâ, &c.

Verùm, ut ad caput rei, à quo diverticulum feci, revertar, observavi in febribus *autumnalibus* sanguinem qualiumcunq; febricitantium mittendum esse parçè, non ad ultorū verò, vel ætatis florem egressorū nequaquam. Medicamenta refrigerantia exhibentur cum periculo, nisi febris nimium exæstuet, ac æger sit juvenis. Valde necessaria vomitio, ubi vomendi fuit propensio: At in febribus *vernalibus* sanguis qualiumcunque mitti potest moderatè:

deratè : hominum ætate florentium, copiosè. Clysteres & medicamenta refrigerantia valde profunt, quando juvenis est æger, nec declinat febris, nec prolixa sanguinis missio præcessit. Vomitio, ubi vomendi fuit proclivitas, non absolutè necessaria, satis tamen commoda. Nec vomitorii omissio *Diarrhæam* planè infert in febris declinatione. Nunquam hætenus observavi, ventrem durum, vel pedes tumefactos excepisse febres *vernales*, sive continuæ, sive intermittentes illæ fuerint. Post *autumnales* verò, admodum frequens est utrumque, maximè ubi copiosè missus fuerit sanguis, vel in puerili ætate constitutus sit æger, vel etiam ætatem vegetam exceßerit. Tumor qui puerulis accidit, imprimis ventrium est; qui hominibus, ætatis florem egressis, plerunque pedes primò, fortè etiam ventres deinceps, quando ad Hydropem vergit, occupat.

Secundò, ut de eo porrò inter febres

febres discrimine loquamur, quod ex quorundam Annorum ab aliis differentiâ oritur, proindeque de medelis ad ipsas eo nomine pertinentibus; notandum est differentiæ illius inter unius & alterius anni febres rationem dari semper ex causis manifestis non posse; quandoquidem sæpe fit, ut unus annus sit epidemicus, non quoad Pestem duntaxat, sed etiam quoad febres, nonnisi malignitate ordinariâ minaces, ubi rationem assignare non possumus ex alimentorum vitio, neque ex inferioribus exhalationibus in Aëre putrescentibus, neque ex temporum tempestatumque inordinatis, atque inæqualibus mutationibus, in calidum, & humidum vergentibus: Sed istam constitutionem, cæcæ, malignæ, & inexplicabili Aëris perniciæ nobis inimicæ sobolem esse hætenus fateri cogimur.

Atque uti nulla dari ratio potest differentiæ inter unius & alterius Anni febres, sic nec ulla dari potest

potest circa Prognostica, de frequentis partis anni salubritate, vel insalubritate, ex commodâ vel incommodâ præteritæ partis temperie, instituta. Hyemes quippe Ann. 1662. & 1663. quarum alteram ob clementiam tantum non præternaturalem, alteram verò ob rigorem, mirabantur omnes, salubres admodum æstates, & autumnus consequebantur.

Ego in meâ praxi hæc duas duntaxat observationes de Prognosticis cepi, quæ institui tempore æstivo possunt, sitne autumnus proximus (quoad febres dico) salubris futurus, an minus talis.

I. Observavi, quod quando febres, sive continuæ, sive intermittentes, præmaturè apparuerunt, ut circa festum S. *Johannis*, temperies secuta fuit valde epidemica; imprimis si *Quartana* (genuina Autumni soboles) hic illic à tempore modò dicto quosdam invasit. Anno 1661. quo, præter febres continuas, Tertianæ præ-

præfertim malignæ admodum furebant, inq; multis locis, correptis ferè integris familiis, maximam hominum stragem edebant; eo, inquam, anno, memini, fœminam quandam ædibus meis vicinam, primo Quartanæ suæ paroxysmo ipso S. *Johannis* Festo correptam fuisse. Complures alii, circa idem tempus præmaturum, febribus illis correpti fuere, quæ postmodum adeò epidemicæ evaserunt: quod argumento est, magnum tum fuisse in istâ, quæ tunc obtinebat, aëris temperie, ad istos morbos apparatus, qui deinceps procedente anno stipatiore grassabantur.

2. Notavi, si insectorum examina æstate abundaverint, maxime verò muscæ domesticæ, autumnum proximum valdè insalubrem futurum; id quod in prædicti anni 1661. totâ æstate observabam, sed in duorum sequentium annorum, quæ adeò salubres erant, æstatibus, admodum

E

pauca:

pauca: ubi tamen notandum, hanc quam modo diximus, insectorum copiam, ipsâ ingruente Peste, non adeo observari.

Exceptis his duobus, reliqua Prognostica omnia fallacia observavi; ita ut constitutionis epidemicæ adventantis præsentio difficilis admodum videatur, nec signis ullis, aut rationibus satis conspicua.

Neque minùs difficile est, certam aliquam atque determinatam, curandi rationem proponere, quæ discrimini febrium, ex annorum variâ temperie dependenti, accurate respondeat; quàm (ut jam dictum) ipsius illius varietatis, causas explicare, vel etiam quàm prognostico aliquo diu antea facto, prædicere quantum inter hunc annum, v. gr. atque alium, quoad salubritatem, vel insalubritatem discriminis intererit. Veruntamen quæ nobis, hæc ipsa attentè observantibus, sese obtulerunt, paucis exponere non gravabimur.

In

In febribus igitur autumnalibus, quæ in constitutione epidemica, atque in anno, quo morbi Autumno peculiare (quales sunt Quartanæ, Tertianæq; maligniores) solito maturius, putà mense *Junio*, vel *Julii* initio, occurrerint, venæ sectio maximo periculo non vacat. Id quod in Autumno anni (de quo jam locuti sumus) verissimum esse experientia testata est: tunc enim temporis, præsertim in primo Autumno, phlebotomia maximam partem lethifera visa est; nisi forte ægri, in ipso ætatis vigore constituti, sanguinis jacturam quodammodo ferre poterant; quo quidem in casu, tametsi mortem non intulerit, morbum tamen longum, ac periculi plenissimum, atq; symptomatibus sævissimis stipatum sunt experti. Ego certè ab aliis evacuationibus paria pericula sese obtulisse non memini; atq; speciatim ab illis, quæ per *Emetica* fiebant, quales plerunque tum in illâ, tum

etiam in similibus aliis constitutionibus malignis, exitum satis felicem habuerunt. Verum ut ut hæc sint, jamdudum didici, oportere, ut Medicus hæc in re versatilis ingenii sit, atque pro re natâ consilium capiat, hoc est, pro temporum, atq; agrorum temperie præin suam subinde mutando, vel potius levitèr flectendo, huic scenæ tot discriminibus variegatæ commodè quantum fieri potest, inserviat. Illud interim (ut tandem aliquando argumento præsentis coronidem imponam) affirmare possum, generalem illam methodum jam traditam (quantum quidem ego hæctenus observatione attentâ consequi potui) febrium omnium curationem suo ambitu commodè satis complecti; licèt non ignorem, subinde varias anni tempestates, atque ipsorum annorum varietates prohibere, quò minùs certos aliquos limites figere possimus, quos ultra citraq; progredi, aut consistere non liceat.

at. Præstiterit certè, quando febres grassari incipiunt, diligentèr illorum impetum atq; morem observare, quibus etiam præsidiorum generibus ægri juventur, vel lædantur, ut quamprimùm, *his* repudiatis, *illis* utamur. Quod si illud fiat, existimo reipsa aliquando, facto periculo, comperitum iri, medendi rationem hæcenus expositam quam-minimùm à scopo aberrare. Ad me certè quod attinet, rarissimè ab illa mihi devianum sensi, *vel* in casibus malignis; quibus egregiè accommoda est, quòd fermentationem debitam sustineat, (optimum naturæ organum) cujus ope omnem materiam venenatam in sanguine latitantem expellit atq; amolitur.

Sectio Secunda.

De Symptomatibus febres continuas comitantibus.

Methodus hæcenus enarrata, si quis illam prudenter, & cum destinato animi consilio observaverit, ægros, si non ab omnibus, saltem à plerisque molestis illis symptomatibus immunes præstabit, quæ continuas febres vel comitari, vel iisdem supervenire solent, quæq; Medicum animi anticipitem, atq; sæpè in curationis decursu consilii penè expertem reddunt, immò & illius curæ commissos non rarò è medio auferunt, etiamsi morbi natura mortem non interminari visa sit. Sed quandoquidem vel ægrorum culpâ, Medicum non satis opportunè accersentium, vel ipsius Medici minori sive peritiâ, sive cautelâ, ejusmodi

modi accidentia sæpissime oborta cernuntur, non gravabimur peculiarem eorundem curam summam hic attingere; verum ad ea tantum symptomata me restringam, quæ, tametsi sæpenu-mero præverti potuerint, modo viâ, atq; ordine prædicto quis usus fuisset, cum tamen semel acciderint, diversam quandam, sibiq; propriam curam postulant.

Atq; (ut hinc ordiar) si æger, *Phrenitid.* vel calidiora medicamenta minus propere atq; intempestive sumendo, vel calido nimis temperamento suâ naturâ fretus, in *Phrenitidem* prolapsus fuerit; vel (quod proximè illuc accedit) si non omnino dormiat, sæpe exclamet, aut inconditis vocibus utatur, si vultu ac loquelâ ferociat, si medicamenta, potumve communem avidè & quasi raptim bibat, vel denique urinam habeat suppressam; in hoc, inquam, casu, liberaliori manu, quàm supra indulgi, ad venæ sectionem, clysteres, ac medi-

camenta refrigerantia me accingo, verno tempore præsertim, (quo etiam aliàs symptomate hoc non apparente, juvenes atq; vegero calore præditi, ejusmodi auxilia sine multo discrimine admittunt) atq; talibus remediis utens, ægrum eousq; sustinere conor, donec in diuturnitatem aliquam affectus excurrat, quo tempore non admodum difficile erit eum & à morbo & à symptomate unâ eademq; operâ liberare : id quod fiet *Narcoticum* aliquod medicamentum in largiori paulò dosi exhibendo. Quamvis enim febre vigente, quæ *ναρκώσις* vi prædita sunt non omninò profint, neq; destitutum à Medico scopum feriant ; tamen opportunè, & in declinatione morbi adhibita, præclaros effectus edunt : antea verò prodesse non possunt, partim quia fermentationem vi atq; impetu procurrentem sistere nequeunt, etiam in maximâ dosi exhibitâ, partim verò (quod quidem majoris

majoris adhuc momenti est) materia peccanti tunc temporis massa sanguinea æquabiliter admista, neq; versus separationem adhuc vergenti, ab exhibito hujusmodi medicamento manus injicitur, adeoq; depuratio illa tantopere expetenda impeditur. Verum si ve hæc ratio sit hujusce phænomeni, si ve alia aliqua magis abstrusa, judicent illi, quibus animus atq; otium est talia speculari. Interim ex fideli atq; idoneo observationum plurimarum complexu rem ipsam certissimam esse pronuncio, *Laudanum*, vel alia quævis Narcotica in principio, augmento, vel statu morbi ad symptoma hoc levandum, vel non prodesse omninò, vel, quod sæpe accidit, etiam obesse; verum in ejusdem morbi declinatione eadem mediocri dosi adhibita non sine successu usurpari. Semel equidem Narcotico die morbi duodecimo usus sum, nec frustra; citius autem nunquam prosperè exhibitum

hibitum novi. Quodsi autem illius usum ad decimum quartum usque diem distuleris, tanto magis proficuum evadet, separatione nempe perfectiori tum facta. Neque verò hæc mora, tametsi forte astantes magnopere perterrefaciet horrendum hoc symptoma, mortem statim subinfert; cum sæpe observaverim, hanc rem plerumq; inducias ferre posse ac solere, donec ad Narcotica descendere fuerit opportunum; saltem si caveatur ne *Cardiacis*, calidisq; medicamentis adhibitis, intemperies cœpta accendatur uberiorius, quo casu ægri subito pereunt. Narcotica quibus ego tuti soleo, sunt vel *Laudanum Lond.* ad gr. i. vel sequens. *Rec. flor. Paralyf. M. i. Coq. f. q. aq. cerasor. nigr. Colaturæ* ℥iij. *Dissolve syr. de meconio* ℥ss. *succi limonum* g. viij. vel x. *Misce.*

Illud unicum hic addere placet, quod ad hanc rem observasse non inconsultum arbitror; nempe

pe si symptoma hoc eousque inducias ferat, ut æger ante assumptum Narcoticum commodè purgari possit, medicamentum illud tanto felicius effectum suum editurum. Quocirca ego imperare soleo Pil. coch. ma. ℥ij. in aq. Be-tonicæ dissolut. atque hoc 10 vel 12 horis ante Narcotici exhibitionem. Neque metuendum est à tumultu illo, què calidior illa massa pil. aliàs excitare solet; subsequens enim Narcotici vis pensabit illas turbas, & quietem suavissimam, blandissimamq; inducet.

Quodsi vigiliæ ultra febrem excurrant, cessantibus aliis symptomatibus, observavi, lintheum in aqua rosar. immersum, & frigide sincipiti, ac temporibus applicatum, plus quàm Narcotica quævis prodesse.

Proximo loco de *Pleuritide*, *Pleuris.* ejusq; medicatione, pauca subjungam. Et quidem non me latet, receptam à Medicorum vulgo sen-

sententiam esse, febrem illam continuam, quæ pleuritidi se comitem adjungit, à phlegmone membranæ costas succingentis, cordiq; vicinæ, ortum suum ducere, adeoq; pleuritidis respectu, symptomatis rationem obtinere. Neque omninò displicet hæc sententia : Interim ex aliâ parte existimo pleuritidem ipsam symptomatis vicem subire, respectu febris illius essentialis quâ primò correptus est æger, antequam pleuritis nempe supervenerat ; hæc autem accedente, prior illa febris genium suum deponere mihi videtur, vel potius in pleuritidem converti, quæ jam ex phlegmone prædictâ novam febrem sibi asciscit, eâq; stipatur. Atque posterior hæc febris ita subnascens pari passu cum pleuritide ambulat, cumq; eâ stat, caditque. Certè crediderim, difficilè admodum futurum, ut quis, examine diligentè instituto, exemplum præferat pleuritici alicujus, qui dolore

more lateris (signo hujus affectus
adeò luculento) tentatus fuerit,
antequam febris insultum ali-
quem, saltem leviozem fuisset ex-
pertus. Nam dolor ille nunc qui-
dem citiùs, nunc seriùs invadit,
verùm (quantum observare hacte-
nus mihi licuit) nunquam nisi post
febrim, atque hinc (ut sententiæ
propriæ morem geram) pleuriti-
dem inter *accidentia* enumero,
febrem consequentia.

Pleuritidem vero nasci arbitror
ex materiæ febrilis præcipatione
in pleuram vel musculos interco-
stales ; atque illud quidem in ip-
so fere febris initio accidere, cru-
dâ adhuc existente materiâ, non-
dumque per idoneam ebullitio-
nem lubactâ, adeoque nec ad se-
parationem debitam per loca ma-
gis conferentia, præparatâ. Atque
hoc incommodi sapissime ex in-
tempestivo ac præpostero calido-
rum medicamentorum (ut Pul.
Comitissæ, Aq. Alexipharmacæ,
atque his similium) usu inferitur ;
qualia

qualia frequentèr à Nobilibus quibusdam sceminis exhiberi solent; quarum interim benevolentia charitasque multo melius in pascendis pauperibus quàm in iisdem medicandis, me iudice, collocaretur. Atque illæ quidem eo consilio (si tamen ullo utantur) id faciunt, ut in primo febris insultu provocetur sudor; parum cogitantes, quàm inconsultò atque infelicitèr idem tentent. Natura enim hoc pacto turbata humores adhuc crudos existentes expellere, qua data porta, cogitur: atque adeo nunc in cerebri meninges impetu fertur materia febrilis, indeque phrenitis nascitur; nunc ad membranam costas succingentem idem malum appellit, ex quo pleuritis oboriri solet; præsertim ubi ægrorum ætas, ac temperamentum, annique *tempestas inter ver. atque æstatem* ambigens, sua etiam symbola ad hanc rem contulerint: certè enim tempestate illà febres in pleuritidem transire proclives

proclives sunt: Ad hujus itaque
symptomatis remotionem, hâc
utor methodo.

Quamprimum accersitus fue-
rim, jubeo, si res patiatur, san-
guinem liberalitèr ex brachio af-
fecti lateris mitti. Mox unguen-
tum aliquod accommodum ex ol.
lilior. chamæ, ung. dialthææ &
his similibus, conflatum, dolenti
lateri applicandum præscribo. Si-
mul etiam Bechicis utor ad rei ip-
sius ingenium variè accommodan-
dis. Sed his omnibus ol. amygdal.
dulc. rec. express. faciliè palmam
præripit. Pro potu ordinario
cerevisiam tenuem, ac minimè
acrem, vel Ptisanam ex aq. hor-
dei, liqueritiâ & tantillo sem. anisi
paratam, injungo. Diebus porro
sequentibus, repetitâ Vena-secti-
one, sanguinem etiam copiosè de-
trahi jubeo pro re natâ. Sanè
perquam rarò à sanguinis missione
abstineo, donec ad uncias 42. aut
circiter fuerit detractus, nisi vires
vel ætas ægri contraindicaverint.

Atque

Atque tametsi non sine specie aliqua rationis, metuat aliquis ne tanta sanguinis amissio periculum ingens afferat; ipse tamen sanguis ablatuſ, poſtquam aliquandiu ſteterit, hoſ metus diſſabit, Medicoque patrociniuſ parabit, liberalem hanc Venæ-ſectionem imperanti. Nimiruſ ſpectabitur ſanguis admoduſ corruptuſ, ſaltem poſt primam vicem, ſimiliſque ſerè coloris in ſummo, cum vero pure; ut omittam nunc dicere, vires ægri non valde attritaſ te comperturum, ſi copioſam illam ſanguinis jaçturam tecum reputaveriſ.

Hoc autem in loco monenduſ eſt, ſummâ cautelâ opuſ eſſe, ne per totuſ huiuſce methodi decurſuſ Clyſteres injiciantur, aut pectoraliſ medicamentiſ quicuquam admiſceatur quod alvum ciendi vim habeat: quanto enim aſtrictior alvuſ eſt, tanto tutiuſ phlebotomiã repetemuſ; atque ex adverſo, ſi vel dimidiam illiuſ
(quam

(quam diximus) sanguinis quantitatem ademeris, ubi Clysteres aut alviduca pharmaca exhibueris, ægrum in summum vitæ periculum adduces, ne dicam in mortem præcipitabis: sive quod natura utramque evacuationem tam brevi temporis spatio ferre nequeat; sive ob aliam aliquam rationem, ego sanè non ausim definitò pronunciare; certus interim, factò aliquando periculo, etiam eos tandem in hoc morbo à Clysterum usu sibi temperaturos, qui nunc hæc monita fortassis aspernabuntur. Neque in hoc morbo solùm, verùm & in aliis forsitan omnibus, in quibus curationis negotium in isto cardine (Venæ-sectionem dico) potissimum vertitur.

Sæpe quidem aggressus sum in tractando hoc symptomate, *δεξ-
πείας* rationem aliquam stabilire, quæ citra ingentem hanc sanguinis jacturam subsisteret: nempe vel humorem resolvendo, vel ex-
F pecto-

pectorationis promotione illum evacuando. Sed nondum ea fors mihi contigit ut huic ipsi, supra memoratæ praxi, parem aliquam reperire potuerim; cujus beneficio (non obstante tristi illâ, de pleuritide siccâ, prognosi) ægrum, etiam *non moratus expectorationem*, ab insultu morbi vindico; per ipsum sectæ venæ orificium & pleuritidi fugam parans & sanitati reditum. Certè nisi phlebotomiâ aliquoties celebratâ (huic nempe methodo insistenti) nunquam hæcenus mihi subsistere licuit; licet neque illud intentatum reliquerim, ut ultrâ secundam tertiamve vicem non progrederer; sed ipsâ rei necessitate adactus Naturam ducem sequutus sum, etiam dum eidem naturæ vim inferre videbar.

*Febris
symptoma-
tica Ver-
nalis.*

Verùm hic prætereundum non est, quòd *verno tempore*, præcipue verò anni tempestate quæ *finem veris & initium æstatis* complectitur, febris quædam tum temporis invadere solet, quæ tametfi

metfi pathognomonicis pleuritidis, aut etiam peripneumoniæ signis destituitur, symptomatis tamen rationem habet, inflammationis cujusdam respectu circa partes spiritales alicubi delitescens: nempe nullus adest lateris dolor, nulla insignis respirandi difficultas; unde nudam febrem adesse suspicatus, illuc aliquando omninò propendi, ut ægros eadem methodo tractarem, quâ in medicandis febricitantibus uti soleo. Veruntamen postea mecum reputavi, hanc anni tempestatem (ut infrâ dicetur) non ejusmodi febribus producendis idoneam esse, quæ in continuitatem excurrant; illæ enim vel suâ sponte quasi diffiliunt, & in intermittentium classẽ se reponunt, vel in pleuritides atque id genus alias inflammationes præcipites ruunt: & quidem porro attentè emissum in hac ægritudine sanguinem spectavi, qui pleuriticorum sanguinem æmulari visus est; ruborem

etiam genarum adesse observavi, atque propensionem quandam ad sanguinem è naribus emittendum, etiam venæ sectione priùs celebratâ; quin & tussim aliquam, & obscuros quosdam in partibus vitalibus dolores nonnunquam deprehendi. His igitur omnibus ritè perpenſis, eò tandem deveni, ut eâdem omninò methodo mihi procedendum in hoc casu decreverim, quâ in pleuritide sæpe cum ſingulari ſucceſſu uſus ſum; id quod ſælicitèr, atque ex voto ceſſit.

Tuſſis.

Sæpe accidit, ægrum per totum morbi decurſum *tuſſi* moleſtâ divexari; nimirum commotâ vehementèr ac tumultuante ſanguineâ mole, omnibus jam ad ſeditionem & partium ſtudia ſpectantibus, ſit ut humores quidam ſoluti, diſfluentesq; è maſſâ ſanguinis per vaſcula pulmonaria, vel etiam per diapedeſin in tracheæ membranam interiorem, teneriorem ſcilicet atque exquisito ſenſu præditam, trans-

transferantur: hinc *tussis* oboritur; quæ primò sicca est, quoniam tenuis adhuc materia vim expultricem eludit; mox crassescit, atque expectoratu difficilis evadit, eò quòd sensim febrili calore torreatur, atque affsetur: hinc fit, ut suffocationis metu percellatur æger, utpote cui vires desunt ad lentam hanc viscidamq; materiam tussi eliminandam. Ego in hoc effectu rarò alio aliquò medicamento utor præter *oleum amygdalarum dulcium* recentèr expressum, nisi forsan acciderit (accidit autem aliquoties) ut ægrotus oleum prorsus aversetur; tunc enim vulgaribus illis pectoralibus, ut licet, opem ferre conamur. Interim oleum illud amygdalarum, siquidem illo per ægrum uti licuerit, Bechicis aliis anteponendum censeo, ob eam causam præcipuè, quòd cùm necesse sit hæc liberaliùs, & majori quantitate exhibere, modò prodesse velimus, hoc pacto ventriculum jam satis super-

que debilem & ad nauseam proclivem oneramus ; nonnunquam etiam eâdem operâ præpedimur, ne reliquæ, eodem ipso tempore transigenda, procuremus. Neque verò satis aut intellectu assequor, aut experientiâ edoctus sum, cur ab hujus olei, quod jam diximus, usu in febribus abhorreamus, eò quòd scilicet inflammabile sit, adeoq; metuendum ne febrim adaugeat. Fac enim, illud suâ naturâ calidum esse, certè tamen calor ille tantus non est, ut aliundè non abundè pensetur : præ cæteris enim manifesta vi pectori conducit, aperitq; vias, ac lenit, adeoq; expectorationem promovet, quâ (præsertim si copiosior acciderit) tum exoneratur sanguis à molesto humore, commodè jam excreto, tum eâdem operâ nonnihil refrigeratur ; adeoq; me non admodum malè habet, si quando viderim symptoma hoc intercurrere, cujus beneficio non parum etiam ægro beneficii accedit.

dit. Illud unicum nunc moneo, unâ, eademq; vice tutum non esse, totis cochlearibus hoc oleum exhibere; periculum enim est, ne & ventriculo nauseam & alvæ fluxum inducamus: parcè itaque, sed frequentèr interdiu, noctuq; propinandum erit, quo non solum expectoratione factâ tussim leniemus, verumetiam, quod alicujus momenti est, attritas ægri vires blando nutrimento nonnihil solabimur.

Fit nonnunquam, ut *hemor-* *Narium*
rhagia narium superveniat; sive *hemorrh-*
quod medicamenta nimis calida *gia.*
in morbi initio fuerint exhibita, sive quod ebullitio non satis coercita fuerit, ægro nempe vel in florenti ætate constituto, vel anni tempestate coadjuvante. Hoc si fiat, non admodum juvabunt ea, quæ ad sistendum sanguinis motum vulgò fieri consueverunt, qualia sunt venæ sectiones, ligaturæ, medicamenta adstringentia, atque agglutinantia, vel etiam

sanguinis acrimoniam contemperantia, &c. quamvis enim pro Medicorum consilio, ac prudentiâ, his atque hujusmodi aliis uti liceat; in eo tamen cardo rei vertitur, ut idoneo aliquo medicamento sanguinis ebullitioni frænum imponatur, quod sistat, figatq; illius impetum in præcipitia quæque ruentem. Verum quidem est, si symptoma seorsim spectetur, ea quæ supra enumeravimus (ac venæ sectionem potissimum) accommoda satis esse; nec ego ipse dubitarem, iisdem uti; sed nempe symptomatis hujus causam (saltem si phlebotomiam exceperis) non satis attingunt, quam profectò non majori ratione per prædicta tollere, quàm si gladio ignem extinguere satageres. Ego itaq; in hoc casu, frustra aliis tentatis, tale quidpiam adhibere soleo, quale nunc subnectam.

Rcc. aq. portulacæ, & papaveris ceratici āa ʒiſs. syr. de meconio ʒv. syr. paralysæos ʒſs. M. f. haustus.

Nolim

Nolim autem hæc ita intelligi, quasi hæmorrhagiam quamlibet ita statim curari velim; quin potius illa sæpe permittenda est, atque ægro plurimum prodesse potest, partim nimiam ebullitionem reprimendo, partim etiam criticè aliquando morbum solvendo. Atque revera parum proderit huic symptomati frænum prædictum aptare, priusquam illud aliquantisper excurrerit, vel etiam priusquam vena in brachio secta fuerit. Illud diligentè advertendum est, hanc ipsam, atque alias omnes immodicas hæmorrhagias peculiare illud obtinere, quod quamprimum illæ quomodocunq; sedatæ fuerint, nisi leniens aliqua purgatio celebretur, metus est ne recidivam æger patiatur; proindeque purgandum erit, quamvis (si febris tempora spectentur) serius aliquanto id fieri soleat, atque debeat, nisi symptoma hoc acciderit.

Hoc symptoma plerunque se-
nibus

Singultus.

nibus accidit post copiosas evacuationes, vel per secessum ex diarrhæa, vel maximè per vomitiones, atque sæpenumero mortem præ foribus adesse denunciat. Ingenuè fateor, me mihi met ipsi de *Singultus* causa disquirenti satisfacere non posse; nihilominus observavi, sæpe illum ex turbis, ac tumultu ab asperioribus medicamentis in ventriculo, loiscque vicinis excitato, ortum ducere, quibus sedandis atque in pristinam pacem reducendis cum naturæ vires non suffecerint, fit ut ingens periculum immineat: proindeque consentaneum existimavi, curam eo dirigere, ut quod natura per se nequibat, artis adminiculo suffulta perficeret. *Diascordium* igitur largâ dosi exhibitum, nempe ad $\mathfrak{z}\mathfrak{i}\mathfrak{j}$, à scopo meo non aberravit; cum *seminè anethi*, aliisque, quæ tanquam specifica decantantur, usus, nihil profecissem.

Diarrhas.

Si in morbi hujus decursu *Diarrhæa*-

arrheam obortam conspexeris, quæ (uti jam alicubi supra notavimus) accidere tum solet, cum in morbi initio vomitorii propinandi indicatio se obtulit, neque tamen illud propinatum fuit; dico in hoc casu convenire, ut quovis morbi tempore (nisi vires contraindicaverint) *emeticum* exhibeatur, etiamsi jampridem illa ad vomendum propensio præterierit. Quoniam autem hac de re satis, opinor in superioribus pagellis à nobis dictum est, illud hoc in loco duntaxat annectam, quid facto sit opus, si exhibito licèt emetico nihilominus *Diarrhæa* supervenerit. Quod tamen oppidò rarum est, nisi in febre symptomaticâ modò dictâ, ubi vomitorium, hoc symptoma non solum non impedit sed quandoque creat; quod notatu dignum est. Itaq; cum sic se res habuerit, præ quibusvis astringentibus hujusmodi clysterem profuisse comperi. *Rec. Cort. granator. ʒss. ros. rubr. p. ij. Coq. in lactis*

lactis vaccini s. q. Colaturæ t̄ssr. dissolve Diascordii ʒiij. M. F. Enema. Non suaserim ut majori quantitate clysterem injicias, quamvis enim propriâ vi adstrictionem polliceatur, metuendum tamen est, ne suâ mole laceffat intestina, adeoque fluxum alvi, quem consopire animus erat, uberius provocet.

Sed forsitan objiciet his aliquis, magis è re videri, ut, præsertim declinante morbo, diarrhæam, si quidem acciderit, permittas potius quam sistas, quandoquidem fluxus ille alvi nonnunquam criticus est, morbumque solvit. Respondeo, me non inficias iturum, fieri aliquando, ut febris per hanc portam sibi viam faciat, atque effugiat; verum illud rariùs accidit, quàm ut illius spe quicquam moliamur: quin & ratio illa, quâ de medelâ febrium universim loquuti, fluxûs hujusce sistendi necessitatem ostendere conati sumus, etiam hic omnino locum obtinet.

tinet. Nuncautem illud addendum est, meâ quidem sententiâ ainmadversione non indignum, nempe ad genuinam sanguinis depurationem non tantum necessariam esse illam quarundam partium secretionem, quæ per *fæces* fit, sed requiritur etiam ut secerantur aliæ, tanquam *flores*, id quod in aliis etiam liquoribus opulentis atque heterogeneis quotidie cernimus. Itaque si Diarrhææ nimium indulseris, mediam solummodo depurationem, tantopere expetitam, procurabis, atque etiam forsan, quod postremo in loco rejiciendum erat primo excernetur. Fateor equidem separatione illâ per flores jam factâ (quæ, ut obiter id attingam, sensim, & sine sensu peragi solet, atque plerunque paulo pleniori *διάρροον* potius quam sudore manifesto) Diarrhæam, si forte acciderit, periculi non multum interminari: Sciendum tamen est, illam tum non aliunde accidere, quàm

quàm quòd purgatio subducendis facibus dicata, non opportunè exhibita fuerit; quæ quidem faeces mora suâ fermenti alicujus maligni indolem adeptæ, intestina jam ad excretionem irritant, stimulantque; ut omittam dicere, liquidissimam illam excrementorum consistentiam (tali enim formâ plerunque visuntur) satis indicare, ea pro criticâ morbi solutione habenda non esse.

Atque hæc sunt illa symptomata, quæ in febribus occurrere solent. Sunt autem & alia quædam, quibus memorandis nunc supersedebimus, partim quidem, quoniam ea minoris momenti sunt; partim verò, quòd peculiarem nullam curationem postulent, febre enim ritè tractatâ, sponte sua cessant.

Itens.

Forſan etiam inter symptomata febribus supervenientia recenseri potest *Iliaca passio*, eo quòd vomitus enormes qui initio febrium accidere solent, huic occasionem quan-

quandoque subministrant.

Horrenda hæc affectio est, & huc usque omnium fere judicio funesta, ex intestinorum motu inverso, ac præpostero originem ducens. Nimirum intestinorum fibræ, quæ à superioribus versus inferiora contrahi debent, contrahuntur ad superiora, & quæcunque in intestinis continentur non versus alvum sed ventriculum protruduntur, & impetu facto ad os regurgitant; adeo ut enemata, quantumcunque acria, emetica evadant, uti etiam cathartica per os assumpta per vomitum subito excernuntur. Et, meâ quidem sententiâ, exquisitus ille, ac intolerandus dolor huic morbo superveniens, non aliunde oritur quàm ex præpostero intestinorum motu modò dicto. Cum enim finis illi quos multiplices intestinorum circumvolutiones constituunt, ita à naturâ formati sint ut ad descensum sæcum quàm aptissimè conducerent, cum ii, inquam, motui

motui suis fibris contrario cedere cogantur, exoritur inde prædictus dolor; qui quidem uni parti instar terebelli infigitur, cum aut valvula quæ ad initium coli apposita excrementorum ad ileon regressum impedit, aut alia quævis membrana ad sinum pertinens, vim hujus præposteri impulsus sola sustinet.

Hujus verò inversionis unde dolor ille exoritur duplicem causam assignare licet. Obstructionem nempe, vel irritationem.

Primò igitur quæcunque intestina vehementer obstruunt ut nihil per inferiora descendere valeat, hunc contrarium in intestinis motum ut producant necesse est, & nemini non notum. In horum censum ab Authoribus referri solent fæces induratae, flatus crassi magnâ copia collecti, ac intestina velut in nodum convolventes, constrictio intestinorum in hernia, inflammatio denique, aliique tumores magni, qui cavitatem internam

ternam intestini occludunt. Interim verò haud negandum quòd motus contrarius hisce causis originem debens, potius ingestorum, quàm intestinorum motus habendus, neque hæc totius intestinorum ductûs inversio est, sed illorum tantùm quæ super sede istius obstructionis sita sunt. Quam ob causam *affectio iliaca* hinc profecta, à me *notha* appellatur.

Secundò verò opinor, quòd in affectu iliaco causa inversionis peristaltici intestinorum motûs ut plurimum ita se habet. Nimirum ex tumultuante sanguine in febre nuper conceptâ, in ventriculum & proxima intestina deponuntur humores acres & maligni, ex quibus ventriculus primò motum suum invertere ac violento impetu materiam molestam in eo contentam per os rejicere cogitur: Ventriculi tandem motui validiori, intestina *tenuia* ipsi continua jam debilita-

ta cedunt, & cum his demum *majora* in consensum trahuntur, vomituriente ventriculo quasi choream ducente. Hunc affectum *verum ileum* voco, & ille hujus loci est. Methodus eum curandi hactenus fere incognita fuit, quicquid nonnulli jactent de usu *argenti vivi*, & *globulorum*, quæ præterquam quòd parum conducunt, noxam sæpe hæud contemnendam inferunt. Ego cum felici successu hæc methodo utor.

Quando liquet ex clysteribus per os rejectis & aliis signis *verum esse ileum*, tunc in hæc tria enitor. 1. Ut contrarius iste ventriculi motus, quæ similem motum in intestinis efficit, impediatur. 2. Ut intestina acri humore debilitata corroborentur. 3. Ut ventriculus ac intestina ab istis humoribus liberentur. Quibus indicationibus ut satisfaciam, curationem hoc ritu instituo. Primo *salis absinthii* ℞j ex cochleari uno *succi limonum* mane, & se-

ro

ro fumendum præscribo, interme-
diis vero temporibus *aquæ men-
thæ stillatitiæ* sine saccharo, alio-
ve quovis additamento cochlea-
ria aliquot bis quaq; horâ propi-
no, cujus vel solius repetito
usu & vomitus & dolor ex eo
natus subito evanescent. Dum
hæc fiunt *catulum viventem* nudo
ventri indefinentèr accumbere
jubeo. Postquam verò dolor
cum vomitu per spacium diei uni-
us, vel alterius omnino cessa-
verit, tum *pil. coch. ma. 3j. in a-
quâ menthæ*, dissolutam exhibeo,
quam etiam aquam (quò certiùs
vomitùs recursum prævertam)
toto catharseos tempore sæpius
fumendam injungo. Neque ca-
tulus removendus antequam
usum pilularum æger aggredia-
tur.

Observavi frustra pilulas istas
vel quodvis aliud catharticum,
utcunque forte, propinari, donec
ventriculo corroborato, atque
adeo ad motum naturalem re-
ducto,

ducto, intestina etiam ad proprium motum æquè reducta fuerint. Aliàs enim cathartica omnia intus assumpta emetica evadent, & plus damni quàm commodi inferent. Inde est quod remediis purgantibus viam facere non aggredior donec per spacium quoddam medicamentis istis ventriculum respicientibus usus fuerim.

Victum valde tenuem ægro præscribo, ita ut nonnisi cochlearia aliquot jusculi ex pullo gallinaceo parati sorbenda bis vel ter in die permittam. Interim verò ut per totam ægrotationem in lecto decumbat jubeo, donec perfectæ sanationis signa appareant, ac etiam post sanationem per longum tempus in prædictæ aquæ usu persistere & laneis duplicatis ventrem à frigore bene defendere impero, quo minus recidiva fiat, cui hic affectus præ omnibus aliis est obnoxius.

Pauca hæc universam meam in
curando

curando hoc affectu methodum
exhauriunt, quam à nemine
consulto ob simplicitatem suam
& splendidioris sive verborum si-
ve pharmacorum apparatus defe-
ctum aspernatum iri confido. De
symptomatis igitur hætenus.

G 3

SECT.

Sectio Tertia.

De Febris Intermittentibus.

JAm ut addamus nonnulla de *Febris Intermittentibus* ; Primo loco, quò naturam illarum atque genium conjecturâ saltem assequamur, advertendum est, quòd in paroxysmis febrium intermittantium hæc tria tempora spectanda sunt. 1. Tempus *exhorrescentiæ*. 2. Tempus *ebullitionis*. 3. Tempus *despumationis*. Et quidem ad *exhorrescentiam* quòd attinet (ut de his rebus summatim loquar) ego illam exinde oriundam arbitror, quòd materia febrilis, quæ nondum turgescens à massâ sanguineâ utcunq; assimilata fuerat, jam tandem non solùm inutilis, verùm & inimica naturæ facta, illam exagitat quodammodo,

dammodo, atque laceffit : ex quo fit, ut naturali quodam sensu irritata, & quasi fugam molita, rigorem in corpore excitet, atq; horrorem, averſationis ſuæ teſtem, & indicem. Eodem planè modo, quo potionès purgantes à delicatulis aſſumptæ, aut etiam toxica incautè deglutita, horrores ſtatim inferre ſolent, aliaq; id genus ſymptomata. Natura itaq; hoc pacto irritata (ut ad tempus *ebullitionis* jam tranſeamus) quò faciliùs hunc hoſtem à ſuis cervicibus depellat, fermentationem aggreditur, ſolennem nempe machinam, quâ in febribus, & quibuſdam aliis acutis morbis uti conſuevit, cùm ſanguinis molem ab inteſtiniſ inimicis liberare conatur : hujus enim efferveſcentiæ beneficio diſjunctæ peccantiſ illius materiæ partes, quæ ſanguini æquabiliter admixtæ fuerant, aggregari quodammodo incipiunt, atque adeo leviori operâ ſubigi poſſunt, ut ad deſpumationem opportunæ eva-

dant. Et quidè ut hoc fiat, vel ex eo plurimum referre constat, quòd, qui ex febribus intermittentibus moriuntur, siquidem in paroxysmo pereant, in primo illo tempore (exhorrescentiæ scilicet) fato fungantur, nam si ad tempus effervescentiæ pertigerint, saltem pro illâ vice non moriuntur. Atque per hæc duo tempora res ægrorum in angusto versantur; quibus elapsis, tertium tempus, quod *despumationi* dicatum est, insequitur; quo succedente, symptomata omnia primò leniora fiunt, atque tandem planè evanescunt. *Despumationis* autem nomine nihil aliud significatum volo, quàm materiæ febrilis jam subactæ, & quasi devictæ, expulsionem, seu separationem; atque illud quod separatur, partim (ut in aliis liquoribus cernere licet) florum, partim sæcum rationem, & sortem obtinet. His ita positis videamus, quomodo fiat, ut redeat paroxysmus, quandoquidem ægrorum

grorum fors in vado jam constituta videtur. Nimirum febrilis materia nondum tota emigravit, sed, quemadmodum apum embrya statis temporibus sensim succrescunt, ita latens hæc materia pro typorum ratione denuò caput effert, ac novum negotium naturæ faceffit, idem stadium decurrens quod in præcedentibus modò ostendimus. Nunc autem, si quis à me causam quæsierit, cur formes ille delitescens effervescentiâ præcedenti non satis subactus, ac proinde cum reliquâ materiâ peccante non expulsus, proindeque novas tragædias daturus, non eodem modo in omni febre intermittenti progrediatur (nam nunc unum, nunc duos, nunc tres dies exigit, priusquam ad maturitatem perveniat, novumq; paroxysmum excitet) de hac re, inquam, si quis mihi negotium exhibeat, ego planè me nescire fateor. Neque verò quisquam alius, quòd sciam, in hâc causâ tam præclare

clarè se gessit, ut arcanum hoc opus naturæ satis enarrâsse videatur. Ego Philosophi nomen non ambio; & qui titulum illum se mereri existimant, atque me fortassis hoc nomine culpandum putabunt, quòd in hæc penetralia non irrumpere conatus sim; moneo illos, ut in aliis naturæ operibus, quæ ubique nobis obversantur, vires suas experiri velint, antequam aliis dicam scribant. Libentè enim quæsierim, cur *equus* ad ἀκμὴν suam pertingat septem annorum spatio, *homo* 21. cur in *plantarum* regno, hæc mense *Mai*, illa *Junio*, ista alio, florere soleat; ut innumera alia nunc fileam. Quod si doctissimos quosq; viros non pudeat suam ignorantiam in his rebus palam fateri, non video, cur mihi vitio verti debeat, si in re non minùs difficili, atque forsitan prorsus inexplicabili, manus ab αἰτιολογία abstineam: quippe cùm persuasissimus sim, Naturam non minùs hic
 loci

loci quàm in aliis quibuscunque methodo quadam certâ, atque ordine progredi: *quartanosa* enim (ut sic dicam) ac *tertianosa* materia non minùs naturæ legibus subjacet, iisq; regitur, quàm alia corpora qualiacunque.

Febrium autem intermittentium quædam *Veris* sunt, quædam *Autumni*. Quamvis enim in tempestatibus intermediis nonnullæ oboriantur, quoniam tamen illæ, & minùs frequentes sunt, & ad prædictas reduci possunt (illas nempe, quibus magis appropinquant) idcirco illas omnes sub duobus hisce generibus, *Vernalibus* nempe atque *Autumnalibus*, complectar. Et quidem usq; adeò necessaria est hæc febrium distinctio, ut nisi eandem in praxi sedulò contemplemur, neque de earum duratione prognostico aliquo ritè factò quicquam pronunciare, neque commodo regimine ægrorum corpora curare poterimus, habitâ tum tempestatum
tum

tum naturæ febrium diversæ ratione. Verum quidem est, febres utriusq; tempestatis ingenium non planè dissimile nancisci, siue modum spectes primi insultus, qui cum horrore primò incipit, mox in calorem erumpit, ac tandem per sudorem solvitur; siue typorum discrimina, quorum respectu quædam *Tertianæ* sunt tum Vere, tum etiam Autumno. Interim tamen non dubito, quin febres istæ totâ suâ naturâ, siue essentialiter distinguantur.

Atque ut de *Vernalibus* primò dicam, illæ omnes vel *Quotidianæ* sunt, vel *Tertianæ*, & vel ferriùs, vel ocyùs ingruunt, pro vario tempestatis apparatu. Nam per brumale frigus spiritus concentrati vires in suo recessu sibi acquirunt, quos appropinquantis postea solis calor jam vegetos evocat, qui cum viscidis humoribus (minùs tamen viscidi sunt hi, quàm quos in Autumno prægressi fervores excoxerunt, ac torrefecerunt)

fecerunt) commissi, quos durante hyeme natura in sanguinis massâ congefferat, dum avolare nituntur, implexi detinentur & quasi irretiti, adeoque vernam hanc ebullitionem concitant. Eodem planè modo, quo vasa cerevisiâ repleta, atque in arenâ vel cellâ frigidâ diutiùs reposita, si igni admoveantur, tumultum statim concipiunt, & liquor ad volatum pronus est. Sanguis hoc modo affectus purgationem sui molitur, atque spirituum volatilium ope negotium hoc sat citò peragit, nisi forte nimiâ viscidorum succorum vi instructus fuerit, qui fermentationem cœptam remorentur; & licet hoc ipsum accadat, effervescentia tamen verina rarò continua, suiq; similis manet, verùm dissilire, atque in diversos paroxysmos quasi findi solet. Sanguine enim opulenti hifce spiritibus jam turgido, natura negotium suum quasi præceptis aggredditur, & quarundam partium
secre-

secretionem ad modum perfectæ solutionis per paroxysmos particulares peragit, priusquam universali separatione defungatur. Atque hæc mihi quidè[m] ratio non inidonea videtur, quòd *vernâ tempestate*, præsertim illâ, quæ æstatem propiùs attingit, vel *pauca*, vel omninò nullæ *febres continuæ* occurrant (nisi forte constitutio fuerit epidemica;) fermentationes enim tunc temporis obortæ vel subito consopiantur, vel ad intermissionem properant; vel denique partes humorum ad separationem proniores, præmaturè, & cum vi quadam aliò transferuntur; ex quo mox *Anginæ*, *Peripneumoniarum*, *Pleuritides*, aliæque id genus pestes succrescunt, quæ *desinente* potissimùm *Vere* caput suum exerunt.

Has itaque febres intermittentes variis modis & quidem cum optato exitu aggredi licet, uti mihi non infrequenti observatione abundè constitit.

Non-

Nonnunquam *Emeticum* tempestivè propinatum, ut nempe ante paroxysmum negotio suo defungi possit, felicissimè successit, præsertim si largam *Diascordii* dosin post finitam emetici operationem exhibueris, immediatè ante paroxysmi insultum.

Est ubi sanitatem videas institutam per *diaphoretica*, quæ sudorem in *paroxysmi solutione* obortum promoveant, ægro interim optimè stragulis cooperto; id quod tantopere, ac tamdiu faciendum est, quamdiu vires ægri patiantur. Atque hoc in Veris intermittentibus, præcipuè *Quotidianis*, sæpe obtinuit: humoribus enim in hac tempestate non admodum crassis existentibus, solutio, aliàs imperfecta futura, in perfectam adolescit; quod quidem in Autumno nunquam accidit.

Quid quod, *Clysteris*, in diebus intermittentibus per triduum vel quatrimum exhibiti, beneficio,

cio, *Tertianas* aliquando curaverim.

Veruntamen, si ob phlebotomiam, liberiori manu celebratam, quò tempestas ipsa parùm cautos facilè inclinat ; vel ob ægri debilitatem antecedaneam, spiritus illi qui subitò ad despumationem se accingerent, pauperiores facti minùs valeant ; accidere potest, ut hujusmodi febres Vernales, Autumnalium diurnitatem æmulentur. Sed sanè non solent illæ eousq; durare ; quippe quæ vel sponte suâ desinant, vel leviori remediorum ope facilè in fugam vertantur.

Intermittentes autem *Autumnales* non tam levi operâ se amoveri patiuntur. De illis igitur nonnulla mihi dicenda sunt. Si Autumnalis constitutio fuerit epidemica, circa *Junium* adultum solent invadere. Sin minùs, *Augustum* præstolantur & *Septembris* initium ; in subsequentibus verò mensibus rariùs occurrunt.

Cùm

Cùm earum ingens aliquod agmen simul invaserit, observare licebit earum paroxysmos plerumque unâ eâdemq; diei horâ contingere, accessionibus nunc prævertentibus, nunc postponentibus, simili planè modo, atque eodem tenore: nisi quod accidere queat, ut ordo ille medicamentis adhibitis, quæ retardandi, vel præcipitandi vi pollent, in quibusdam corporibus immutetur, vel pervertatur.

Typorum ratione vel *Tertiana* sunt, vel *Quartana*. Atque de Quartanis quidem illud meritò affirmari potest, eas genuinam esse Autumni sobolem. Utræque profectò eâ affinitate inter se connexæ sunt, ut sæpenumerò vices permutare, saltem ad tempus, deprehendantur, mox fortassis ad pristinum genium redituræ. Sed *Tertianæ* vernaes, *Quartanarum* typos nunquam induunt, cùm toto (ut ita dicam) cœlo à se invicem distinguantur. Neque porro
H obser-

observavi unquam, hâc tempestate, *Quotidianam* contigisse, nisi quis *Tertianam* duplicem, vel triplicem *Quartanam* hoc nomine censuerit ἀκνυελογως appellandam.

Has autem febres intermittentes eo ferè modo suam originem nancisci arbitror quem nunc summatim attingemus. Nempe anno surgente, atque progressu, sanguis etiam pro ratâ proportionem exaltatur (haud secùs ac vegetabilia quævis augmentis atque declinationibus suis anni cursum referunt) donec ad ἀκμην suam, ultimumq; vigorem pervenerit; hinc parallelis motibus cum tempestatibus anni pergens, eo declinante relaxari tandem & ipse incipit; ac tum præcipuè cùm ab accidentali aliquâ causâ promotus fuerit, putà sanguinis immodicâ jacturâ, frigore admissio, cibis crudis, atq; excrementitiis, balneorum usu intempestivo, aliisque non paucis. Jam si sanguis in hoc decidentis statu constitutus eousque prolatur,

batur, ut œconomiam suam tueri, atque præsentī sorte fortunas suas sustinere nequeat, Natura novum consilium meditata eò tandem inclināt, ut aliam quandam texturam effœtæ massæ præparēt, adeoque novas res molitur; id nimirum agens, ut partes sanguineæ molis, quæ immutationi magis inserviunt, quàm commodissimè separentur. Atque huc spectat ebullitio mox inducta, quā liquorem sanguineum quandoq; valdè degenerem corripiente, febris inde oriunda mali moris esse solet, & malignis, atq; horrendis symptomatibus plenissima. Illud utcunq; accidit, ut sanguis spiritibus suis magnam partem exutus, & ab æstate præcedenti plurimum adustus, ebullitione suā non nisi tardissimis motibus defungatur, suæq; despumationi longissimam periodum postulet.

Jam verò ut manifestum evadat, quàm difficultè hæ febres (*Autumnales puta*) curationem

admittant, hoc loco perpendendum est; *Continuarum* hujus tempestatis atque *intermittentium* discrimen in eo maximè versari, quòd *continua* conceptam semel effervescentiam *εὐνοχῶς*, unoque tenore perficiant; *intermittentes* autem partitis vicibus, ac diversis temporibus eadem defungantur. Interim in utrisque fermentatio naturæ ductu peragitur spatio horarum 336, aut circitèr : neque enim citius, aut tardius massa sanguinea in humano corpore ordinariò repurgatur, si negotium naturæ permiseris; haud secùs ac pomatium suam, vinum, atque cerevisia suam, ac peculiarem habet periodum, quâ depurentur. Quamvis autem in febribus intermittentibus sanguis nonnunquam (ut in *Quartana* contingit) sex mensium spatio despumationem suam moliatur, ac tandem perficiat; non tamen (si ritè calculum ponas) plus temporis in eadem ob-

solven-

solvendâ impenditur, quàm quod in continuis impendi naturalitèr solet: quatuordecim enim *νυχθημέρα*, sive dies naturales efficiunt horas 336; tribuendo nempe horas quinque cum dimidia cuilibet paroxysmo quartanarum, habebis in quartana valorem 14 dierum, *b.e.* horas 336. Jam si quis dixerit, quartanam, verbi causa, (eadem enim reliquarum intermittentium ratio subintelligenda est) ultra sex mensium spatium aliquando excurrere, antequam periodum suam absolvat; respondeo, idem etiam non rarò in continuis febribus spectari, quæ sæpe ultra dies quatuordecim protrahuntur: in utroque nimirum casu, si effervescentiam (præsertim circa febrium finem) ritè, atque ordine decurrere ac sustineri vegetam curaveris, despumatio intra prædicti temporis spatium, hoc est quatuordecim dierum vel 336 horarum, peragetur: quòd si verò effervescentiam

tiam illam, seu fermentationem, refrigerantium medicamentorum aut clysterum usu tunc temporis (scilicet versùs febrium declinationem) importunè inhibueris, & quasi frænum illi injeceris, mirum non est si in longum evagentur, ordine quippe naturæ perturbato. Namque hoc modo relaxatur quodammodo sanguinis humani tonus, unde se ad despumationem accingere cum affectu nequit; immò verò in corporibus debilibus, & effœtis idem aliquando *vel* sponte accidit, nisi cardiacorum ope naturam in illis languentem adjuveris, quò sanguini despumando par sit.

Verùm illud hìc jam porrò notandum arbitror; ea quæ de fermentationis spatio atque continuatione suprà tradidimus, de illis solummodo febribus intelligenda esse, quæ statam quandam naturam, atque habitum nactæ sunt. Sciendum enim est, neque me praterit, febres quasdam esse

esse tum continuas, tum intermittentes, quæ transeuntis & incerti genii sunt, neque in suis effervescentiis ad destinatam periodum pertingunt. Hujus generis sunt, quæ à levi aliquâ offensâ ex sex rerum *non naturalium* quas appellant, ut cibi, potûs, aëris, & his similium, abusu nonnunquam ortum ducunt: his enim morbis correpti subito sæpe convalescunt. Idem etiam in adolescentulis, sanguine puro, ac multis spiritibus referto præditis, aliquando accidit: nimirum febres illorum spirituosâ quadam ac nimis tenui, volucrique materiâ nixæ, fermentationes suas citiùs perficiunt, acceleri gradu spatia sua emensæ evanescunt. Ad fermentationem enim illud primariò requiritur, ut materia fermentescibilis, sive illa sanguis sit, sive vinum, aut alius aliquis liquor quilibet, eâ tenacitate & viscositate polleat, ut spiritus implexos, atque irretitos eatenùs

detinere valeat, ut in liquoris massâ moveri atque agitari possint, eodem ferè modo, quo aves visco captæ, aut muscæ, atque apiculæ melle detentæ, motitare quidem, & murmura sua peragere possint, avolare interim non valentes. Neque tamen (ut obiter illud dicam) eam tenacitatem obtinere debent liquores memorati, ut spiritus prorsus obruant, opprimantque adeo ut non omninò moveantur.

Hic jactis fundamentis (quæ quidem nescio an aliis, mihi certè ratione non contemnendâ niti videntur) mirum non erit, si illis non aliam medendi methodum superstruam, quàm quæ in febribus continuis ad despumationis debitum opus ritè perficiendum adhibenda videtur : cùm nimirum illæ a continuis nullo discrimine sejungantur, si ordinem spectes, quo natura earundem materiam expellere solet, scilicet per effervescentiam certâ periodo com-

comprehensam. Etsi quod ad earum speciem, atque naturæ proprietatem attinet, illas & à continuis, & à se invicem plurimum differre non diffitear. Itaque vel methodum, quâ se natura liberare ab hoc morbo solet, cautè, sollicitèque observando, indicium sumere oportet, quo fermentationem abortam acceleremus, atque ita ad sanitatem ægros perducamus; vel in ipsam causam specificam penetrando, danda erit opera ut remediis efficacibus, ac specificis morbo obviam eatur. Ab horum altero indicationes sumendæ sunt. Ego utramque viam ingressus aliquando fui, atq; illasâ (uti opinor) verecundiâ profiteri possum, non sine summâ curâ, atque attentione animi indefessâ; sed nondum eam felicitatem adeptus sum, ut Autumni febres intermittentes certâ aliquâ praxi, atque medicandî ratione tollere possim, antequàm statas illas fermentationes (de qui-

quibus suprà locuti sumus) peregerint ; utcunque molestum hoc febricitantibus videatur , qui eousque sanitatem suam expectare inviti coguntur. Revera autem si quis inter mortales reperiat , qui sive methodo aliquâ certâ , sive remedio specifico adhibito , febrium harum intermittentium cursum non solùm inhibere , sed etiam omninò abrumperre novit ; existimo eum omni jure teneri , ut humano generi rem illam summoperè expetendam patefaciat : quod si non fecerit , ego illum nec boni civis , nec prudentis viri nomen mereri pronunciare ausim ; Neque enim *civis boni* est , illud in rem suam vertere , quod toti generi humano tam ingens beneficium apporet ; nec viri *prudentis* , divinâ benedictione semetipsum privare , quam à summa bonitate liceret expectare , si ad publicum bonum promovendum se accingeret. Honoris autem , ac divitiarum longe minor

minor apud probos ratio habetur, quàm virtutis, & sapientiæ. Interea temporis, ego rem illam ut satis difficilem arbitror, ita etiam periculosam esse non dubito. Cujus rei luculentum exemplum à pulvere illo (quem *Jesuitarum* appellant) sumere licet. Quamvis enim pulveris illius usu fermentationem ad præsens inhibere possimus, materia tamen adhuc residua, quæ fermentando dissipari debet, intra breve temporis spatium vires suas redintegrat, novumque bellum naturæ indicit. Novi quartanam per aliquot annos durasse, dum hujus pulveris repetito usu subinde interturbaretur: immò quosdam pulvis ille, immediatè ante paroxysmum exhibitus, è vitâ sustulit; etsi inficias ire nolim hujusmodi medicamenta in febrium harum declinatione prudenter & cautè adhibita, aliquando profuisse, & paroxysmos omnino sustulisse; imprimis verò, si *tempestate* quoad istos

istos morbos *minus* epidemicâ usurpentur.

Veruntamen etiam si ex iis quæ nunc annotavimus, vix aliqua spes sanitatis ocyùs restituendæ nobis affulgeat; Medico tamen docto & sagaci locus relinquitur, qui sanguinis debitam depurationem procuraret, quò intra limites à natura definitos ea peragatur, atque etiam ut symptomatibus illis occurrat, quæ in hoc morbo contingere solent, ac supervenire. De hac re igitur paucis & quatenùs illius natura fert, brevissimè dicam; utrumque genus eadè operâ complexus, quò eadè fere medicatio utriq; (*tertiana* scilicet, atque *quartana*) conveniat.

Si itaque harum febrium alterutrâ correptus æger vel *infans* sit, vel *atate* *floreat*, convenit omninò (quantum ego hætenùs edoctus sum) nihil medicamentorum quorumvis ope, aut aëris, ac diætæ mutatione moliri. Nihil enim hinc mali natum hucusque intel-

intellexi, si modo totam rem naturæ permiserim. Id quod ego non sine admiratione præcipue in infantulis sæpe observavi; sanguine namque depuratione sua defuncto, febres illæ sponte sua evanuerunt.

Quod si autem è contrario vel strictiori aliquo regimine utaris, vel medicamenta purgantia subinde adhibeas, (adhiberi scilicet solent eo prætextu, ut obstructions expediantur, atque humores, in primis viis stabulantes, exturbentur) vel si, quod præcipuum est, in *constitutione epidemicâ* venæ-sectio celebretur, fiet ut morbus in longissimum tempus procurrat, atque interim ut ægri mille symptomatibus, iisque periculossimis exponantur.

Si verò febricitantes *provehitioris ætatis* sint, ex utroque morbo non solum diuturnitatis, verum etiam ipsius mortis grave periculum imminet. Hic itaque medicum illud agere oportet, ut naturæ
sup-

suppetias ferat, eamque illis ad-
 miniculis subleuet, quibus ad ne-
 gotium suum peragendum opus
 habuerit. Certè enim in effoetis
 corporibus, nisi fermentatio, car-
 diacorum & corroborantis diætæ
 beneficio sustineatur, illud acci-
 det, ut ægri incertis atque frustra-
 neis paroxysmis divexati debili-
 tentur, atque morbus eousque
 duret, donec languida priùs na-
 tura, paroxysmo aliquo gra-
 viore correpta, ad *ebullitionis*
tempus pertingere non possit, ade-
 oque in ipso *exhorrescentiæ tem-*
pore diem suum obeant ægroti : at-
 que hoc in senibus non rarò usu
 venit, qui longa cathartorum
 serie debilitati fuerunt ; imò, ut
 aliquando visum est, in ipso *vel*
 primorum paroxysmorum rigore
 penitùs defecerunt, cùm exhibi-
 to cardiaco satis forti saltem ad
 tempus aliquod sustineri potu-
 issent.

Cum sanguis tempus illud ex-
 egerit, quod ad despumationem
 suam

suam perficiendam requiritur, necessarium est, ut *provehioris ætatis* ægri eodem ipso tempore, vel paulo antea, insignem aliquam aëris mutationem subeant; sive (quod potius optandum esset) in calidiorē aliquam regionem commigrando, sive mutando saltem locum in quo primum hoc morbo correpti sunt. Mirum sanè est, quantum valeat hæc aëris mutatio ad morbum hunc prorsus abigendam. Interim ut ante hunc temporis articulum aër mutetur, non tantum non necessarium est ad sanitatem ex hoc morbo restituendam, sed & minus convenit. Etiam si enim quis in regionem quantumcunque Australem & calidam migraverit, sanguis tamen ejus in morbido hoc motu semel constitutus, depurationem suam ut peragat necesse est; quod quidem beneficii frustra expectabitur ab inusitato novoque aëre, priusquam procedente atque adulto jam sanguinis motu

motu sanitatis recuperandæ capax fuerit. Insignis ergo illa aëris mutatio tum demum adeunda est, cum primùm æger à paroxysmo liberari potest. Exempli causâ, In *Quartanâ*, quæ primùm in *Autumno* invasit, non citiùs aër mutandus est quàm circa *Februarii* initium. Interim si æger mutare locum vel nolit, vel commodè nequeat, oportebit ut hoc ipsius temporis articulo, forti aliquo medicamento utatur, cujus eæ sint vires, ut uno quasi ictu languescentem illam depurationem potentèr promoveat, & si fieri poterit, perficiat. Ad hanc rem consulerem ego, ut *Electuarii de Ovo*, vel *Theriaca Andromachi* drachma una semis in *Aquæ Cælestis* vel *Aquæ-vitæ* communis uncijs duabus dissoluta exhibeatur. Id quod à me cum successu non infelici in morborum hujusmodi declinatione factum est. Licèt agnoscam calidiora hæc citiùs exhibita vel morbum duplici-

duplicare, vel in febrim continuam permutare; quod ab aliis jamdudum observatum est. Idem in juvenibus hoc morbo detentis fieri potest, cautelâ adhibitâ. Ut autem in puerili ætate idem fiat, non tantum non convenit, verum etiam periculo non vacare pridem observavi.

Notandum est in horum morborum principio (*Tertianæ* verò præcipuè) nonnunquam contingere, ut effervescentia in *juvenibus*; ac robustis eousque adaugeatur, ut meritò tutiùs existimes ingruenti tempestate occurrere, quàm rem totam Naturæ committere. Hoc autem commodissimè fiet *Emetico* in die aliquo intermissionis propinato: illud enim medicamentorum genus plerisque Autumnalibus morbis apprime convenit, & symptomatibus illis præcavet, quibus iidem in vigore sunt obnoxii. Verùm hoc factò, restota naturæ permittenda est. Neque verò crediderim, ingentem

tem illum atque atrocem hujus effervescentiæ insultum, qui primos paroxysmos *Tertianarum* præcipuè, comitari sæpenuerò solet, tam alicujus malignitatis effectum esse, quàm ipsius morbi vis atque roboris: quilibet enim paroxysmus, continuæ febris instar est & compendium; adeoque majori atrocitate ægrum aggreditur quàm continua febris, donec paroxysmorum aliquot progressu, morbi vires aliquousque retundantur. Verùm (ut ut id sit) quandoque accidit, ut præ violentiâ hujus effervescentiæ atque motu effero, *Tertianæ* Autumnales (in juvenibus præcipuè) depuratione suâ ante destinatum tempus defungantur, adeoque post paroxysmos non multos evanescant; opere nempe naturæ præcipitato. *Quartanæ* autem non tam cito pede cursum suum peragunt, nisi forte æger eodem morbo jam antea defunctus fuerit; namque in hoc casu licet

licèt paroxysmis aliquot exerceri possit, medicus tamen illius rei conscius, fidentèr morbum illum subitò evaniturum prædicere poterit : quod observatu dignum est.

Priusquàm huic argumento clausulam addamus, illud monendum venit. Ea quæ de febrium Autumnalium intermittentium duratione, atque de tempore ad sanguinis despumationem requisito dicta jam sunt, ita intelligenda esse, ut nos illud solum nunc spectemus, quod Natura vulgaribus atque usitatis tantùm medicamentis suffulta præstare soleat. Nequaquam enim eo consilio de his rebus ita locuti sumus, ac si doctos & solertes medicos despondere animum velimus, atque vel de melioribus medendi rationibus excogitandis, vel nobilioribus remediis inveniendis spem totam abjicere, quorum ope hujusmodi morborum sanationem accelerent : tantum enim ego

profectò ab hoc proposito absum, ut non desperem *vel* à me ipso tale quidpiam sive methodi, sive remediū aliquando repertum iri.

Sublato morbo æger sedulò purgandus est; incredibile enim dictu, quanta morborum vis ex purgationis defectu post febres Autumnales subnascatur. Miror autem hoc à Medicis minùs caveri, minus etiam admoneri. Quandocunque enim horum morborum alterutrum paulò provectioris ætatis hominibus accidisse vidi, atque purgationem etiam omissam; certò prædicere potui periculosum aliquem morbum eosdem postea adoriturum, de quo tamen illi nondum somniaverant quasi perfectè jam sanati.

Purgantia, quibus uti soleo, eadem ferè sunt cum iis quæ post *febres continuas* exhibenda suasi; atque ea ter quaterve repeti jubeo, uno die interposito. Vel si major aperientium apparatus de-
fidere-

fideretur, sequens Apozema exhiberi possit. *Rec. rad. Rhabarb. Monachor. ʒij. rad. asparag. brusci, petrosel. & polypod. quer. āa ʒj. cortic. mediani fraxini, & tamarisci āa ʒss. fol. agrimon. ceterach. & cap. Ven. āa M. i. Sennæ mund. ʒiss. irrorat. ʒiiij. vini albi epithymi ʒss. agarici troch. ʒij. sem. fœniculi ꝑiv. Coq. in aq. font. ad t̄b̄ss. sub finem adde succi aurantior. ʒiiij. In colaturâ dissolve syr. cichor. cum rheo, & magistral. ad melancholiam āa ʒiss. f. Apozema, de quo cap. t̄b̄ss. sing. matutinis per triduum. Et repetatur quoties opus fuerit.*

Diligentèr autem attendendum, si cessantibus paroxysmis citò nimis purgationem aggrediaris, periculum esse, nè illi redeant; nimirum ex tumultu, quem Cathartica, etiam leviora, in humoribus excitare solent.

Sæpe accidit, *Hydropas* ex causâ prius memoratâ supervenire. Verùm illi facilè aperientium, & Catharticorum ope sanantur, si

quidem recens affectus fuerit. Neque mihi molestum est, quoties hinc natum morbum audio, atq; intelligo; nempe de rei exitu omnia bona tunc temporis animo concipiens. Nonnullos enim usu Apozematis jam præscripti *vel* sine admistione hydropi magis appropriatorum, perſanavi.

Observavi frustra esse, si quis hydropem ex febre intermittenti natum medicamentis tollere conetur, febre illâ adhuc durante: febris enim profectò hoc pacto radices profundius agere deprehendetur, non autem amovebitur hydrops. Expectandum itaq; donec febris exulet, ac tum demùm negotium prosperè suscipiendum.

Infantes post febres Autumnales tum Continuas tum Intermit- tentes, Hectici aliquando fiunt; ventres eorum inflati, tumentes, ac duri evadunt; sæpe etiam tussis, aliaq; tabidorum symptomata subnascuntur; quæ *Rachitidem* planè mentiantur. Hos ego sequenti

quenti modo tractandos consulo. Paretur potio cathartica, quam in febrium continuarum sine assu-
mendam præscripsi. Hujus capiat infantulus Cochl. j. vel ij. plus minus pro ætate, mane per 9 di-
es, uno atque altero die, si opus fuerit, intermisso. Interim verò purgatio ita moderari debet, ac regi, dosem vel augendo vel minuendo, ut ultra 5 vel 6 sedes singulis diebus non procedat. Post finitam catharsin totus venter in-
ungatur linimento aliquo apertivo per aliquot dies. Sequenti uti soleo. *Rec. ol. lilior. & tamarisci*
āa ʒij. succi rad. bryoniae, & apii
āa ʒj. bulliant ad succorum con-
sumptionem, addendo unguenti de
althæa, & butiri insalsi āa ʒj. gum.
ammoniac. in aceto soluti ʒss. ceræ
flavæ q. s. f. linimentum. Sanè
quamplurimi infantes, etiam verâ
Rachitide laborantes, hâc metho-
do à me liberati fuerunt.

Veruntamen cavendum sedù-
lò, nè purgationem aggrediamur

nisi febre jam perfectè fugatâ : licet enim hoc pacto humoris in partes naturales amandati portio quædam evacuari non sine causâ videri possit ; nihilominus ab ipsâ febre nova subinde pravæ materiæ copia suggeretur, quæ non solum purgationem reddet frustaneam, verum & ipsum morbum diuturniorem præstabit, ob rationes antea memoratas.

Observatu non indignum est, quòd cum *febres autumnales* teneram ætatem diu cruciârint, nulla spes sit easdem abigendi, donec abdominis regio, circa lienem præcipuè, indurari, atque tumesceri occæperit ; iisdem enim gradibus, quibus hoc symptoma supervenerit, febris etiam fugam meditatur. Neque forte ex meliori aliquo prognostico morbum hunc brevi abiturum dixeris, quàm si sedulâ animadversione suboriri hoc symptoma perspexeris. Idem porro in crurum tumoribus obtinet, qui in adultis aliquando spectantur. Mul-

Multa etiam alia sunt acciden-
 tia, quæ morbos hosce consequi
 solent, ob purgationem vel non
 omnino, vel non ritè celebratam ;
 quibus in præsentiarum enume-
 randis supersedebimus, cùm cura-
 tionis eadem ferè ratio sit utrobi-
 que, nempe sedimenti ab efferves-
 centiâ præcedaneâ depositi repur-
 gatio, quippe quòd suâ morâ ma-
 lis hujusmodi materiam præbue-
 rit. Quanquam liceret hic loci
 non contemnendum symptomatis
 genus referre ; quod non tantum
 purgationibus, & evacuationibus
 aliis quibuscunque, venæ sectioni
 præsertim, cedere dedignatur ;
 verùm, & ab illis vires sibi acqui-
 rit. Illud autem peculiaris quæ-
 dam est, ac sui generis *mania* quæ
 febres Autumnales nonnunquam
 excipit. Fortassis posthac (re pro-
 bè perpensâ) statuendum videbi-
 tur, manias complures, quæ com-
 munem medicandi rationem as-
 pernuntur, & post evacuationes
 fortiores adhibitas, in miseram
 quandam

quandam stultitiam degenerantes; nonnisi cum ipsâ ægrorum vitâ terminantur; has (inquam) plerasq; omnes febribus Autumnalibus diuturnioribus supervenisse. Miratusq; sæpenumero sum, nullam hujus rei mentionem ab Auctoribus factam fuisse, cum non rarò accidisse viderim. De curâ illius nihil mihi nunc dicendum videtur; licet enim haud pauci sciunt, me non sine prospero successu tractasse hunc morbum, nondum tamen videor rem ipsam pro dignitate satis pensitasse, ut cum prudenti fiduciâ medendi rationem publicè exponam.

SECT.

Sectio Quarta.

De Variolis.

Quandoquidem in more positum est, ut qui de Febris differuere, *variolas* etiam, & *morbillos* attingant; ego iisdem quoque vestigiis insistendum arbitror, sed utrumq; morbum sub *variolarum* capite complectar; partim brevitatis causâ, partim quoniam uterq; eandem curationis methodum sibi vindicare videtur, quantumcunq; discrimen ex naturâ suâ propriisq; rationibus admittant, de quo jam non libet quicquam disputare.

Existimo itaque *variolas*, morbum esse sanguini superinductum, novum quendam statum quasi affectanti. Est enim sanguis humanus luxuriantis cujusdam ac prædivitis naturæ liquor, multosque
in

in se succos opulentos complectitur, adeoq; per totum vitæ curriculum in eodem statu rarissimè persistit; verùm deposito (tanquam exuviis) nativo genio, atq; contextu, semel saltem in vitâ, insignem aliquam mutationem subire aptus natus est, novamque (ut sic loquar) formam induere. Atque hæc mihi de his rebus sæpe meditati, non inidonea ratio visa est, cur illorum sanguis qui nondum hanc mutationem passus est, eandem tam facilè subeat: levissimo enim impulsu illuc inclinat vel ex ipsis effluviis ex ægrotantium sanguine transmissis; non secus ac poma quæ ipsa matura sunt, etiam ea quæ in viciniâ reperiuntur in eandem conditionem perducere solent. Atque idem in multis aliis corporibus cernere est, quæ vel junctis superficiebus, vel influxu quodam è longinquo se invicem afficiunt; & licet pleraque illorum sanguineâ malsâ (quæ tenerior est, atque

que ἐμμετάδοι) multo minùs ad mutationem prona videantur, utrinq; tamen ad similitudinem accedunt ac si eandem appeterent. Et quidem hâc ratione contagiosam hujus morbi naturam non minori saltem verisimilitudine declarare licet, quàm eâ quæ ex ejusdem malignitate adduci solet; quin & multo meliùs nodos illos explicat, quos nectere sibi videntur, qui *variolarum* causam in malignam aliquam, atq; venenatam materiam in sanguinis mole hospitantem, atq; ab eâdem expulsam, rejiciunt. Neque enim video quâ fiat, ut momento quasi temporis, sanguis alicujus, quem mox istâ contagie affectum supponemus, tanto purulento illius materiæ apparatu instructus sit, quantus in hoc morbo secernitur. Uti nec illud mente assequor, si quidem contagium à maligna aliqua causa suggeratur, quamobrem is qui illo afficitur, atque è morbo suo convaluit, postmodum

dum novi contagii non tam capax sit, atq; antea fuerat, ex *variolarum* (ut sic dicam) convictu. Certè in aliis morbis ex maligna aliquâ causâ dependentibus id quotidie cernimus; qui enim cum scemina rem habuerit lue venereâ inquinatâ, non minùs etiam postquam semel atq; iterum ex isto morbo convaluerit, in eundem proclivis est, quàm si nunquam hætenùs eo detentus fuisset. Neque verò nescio, qui *variolas* aliquando passi sunt, nonnunquam in easdem denuò prolabi; sed nempe rariùs hoc contingit, quàm ut causæ nostræ quicquam incommodi afferre possit: universim enim loquendo, qui semel *variolis* defunctus est, de futuro tutus ab earum incurso reputatur. Materiæ autem excretæ impuritas scedita; in hoc morbo, præsertim quando tempestate autumnali invaserit, spectari solita, non magis malignam, atq; venenatam illius naturam significat, quàm

quàm ejusdem contagiem id significâsse jam diximus : sanguis enim cœptâ hâc immutatione renovationem sui moliens, ex propriâ massâ particulas ejusmodi selegit, quæ tametsi cum totâ mole æqualitèr commistæ, satis puræ fuerunt, nunc tamen aggregatæ, novumque contextum adeptæ, corruptelæ speciem induunt; non alitèr quàm (ut alibi dictum est) ventriculo ingestorum partes aliquæ, postquam in corpore nostro μεταβολὴν subierunt.

Porro neque illud malignitatem variolarum satis arguere videtur, quòd secreta materia tam profunda vestigia, dum per carnes viam sibi facit, in corpore nostro relinquat (in autumnoprecipue, atque hiemis initio, quibus temporibus altiùs illa stigmata variolæ nobis inurere solent) cum idem planè effectus ex cujusvis ferè ulceris pure consequatur. Atque quò luculentius adhuc pateat, non particulas aliquas

quas venenatas in sanguine præ-
existentes, eundemque ad sui pro-
pulsionem irritantes, hujus mor-
bi veram causam esse, sed ipsum
sanguinem, mutationes istas affe-
ctantem, eo quo dictum est mo-
do: sæpe observare licet, quos-
dam ex hoc morbo, etsi profundis
vestigiiis non omnino deformes,
totâ tamen vultûs specie, ejusque
lineamentorum ductu, quasque
ipsius corporis fabricâ, eousque
immutatos fuisse, perindè ac si
variolarum interventu perfectam
quandam renovationem totius
massæ Natura designâisset.

Verùm si hæc ipsa, de qua lo-
cuti sumus hætenùs, de variola-
rum ortu sententia (quam neque
novitatem affectans amplector,
neque cui ab aliis meliora edoctus
pertinacitèr adhærebo) verifi-
milior sit, si aliâ aliquâ ratione
commodiùs explicari possit, non
magnoperè pugnabo: profectò
enim curandi indicationes eadem
semper manebunt: adest enim
semper

semper materia quædam, quæ separari debet, atque expelli, quorum utrumque nisi fiat, actum est de viâ ægrotantium.

Quapropter ut fundamento alicui, medendi methodus superstruatur, notandum est, duo esse hujus morbi tempora ; quorum primum *separationis* est; secundum *expulsionis*. Atq; primum quidè illud tempus plerunq; cum febrili ebullitione transigitur, quæ quatuor primis morbi diebus peragi solet, quorum decursu natura id fatagit, ut partes ejusmodi seligat, congregetque, quæ suo sanguinis immutandi proposito interserviant, atque etiam ut illas in carnosas corporis partes relegatas, ibidem deponat ; quo facto, pristina quiete fruitur, sedato jam tumultu, qui, dum hoc ageretur, in sanguine ciebatur. Quamvis interim hîc loci consentaneum fuerit subindicasse, in sanguine laxiori, atque *ευμετακρίτω* nonnunquam accidere, ut separatio-

nis periodus sensim, atque gradatim sine insigni aliquâ ebullitione, naturæ negotium facessente, transigatur, priusquam expulsio materiæ pustularum eruptione se prodat. Mihi verò casus hujusmodi non tantum ideo placet, quod sine ægri tædio atque molestiâ transferit, verum præcipuè, quod æger morbi sui nondum conscius, atque adeò liberi aëris beneficio fretus, multo commodius (ob rationes infra dicendas) ad materiæ secretionem paratus sit, quam si sub calido regimine constitutus, aut nescio quot Cardiacis usus fuisset.

Separatione sic, ope ebullitionis, in sanguine peractâ, *expulsio* jam locum obtinet, quæ per reliquum morbi tempus, mediantibus parvis illis abscessibus, in carne perficitur. Sicut enim à naturâ abscessuum, suâ spetie, non abluunt, ita parem cum aliis cruditatis, maturationis, atque exarescentiæ statum percurrere solent;

solent ; quæ omnia si ritè , atque laudibili modo absolvant, & exequantur , in tuto res est, cum exinde curationis summa dependeat , sin minùs, omnia pessum ruitura sunt. Et quidem postremum hoc negotium priori illo *Separationis* opere, tanto plus temporis sibi vendicat , quòd prius illud in tenui, fluidoque corpore transigatur, atque in ipso (ut sic dicam) naturæ foco ; posterius autem denso spissoque theatro , atque à vitæ fonte paulò remotiori , partes suas exequi coacta sit.

His ita præmissis , indicationes exurgunt : 1. Ut æquabilis ille tenor ebullitionis in sanguine conservetur, qui neque nimis properè separationem nimiam suam vi perficiat , neque tamen torpido nimis motu eandem remoretur, vel non satis idoneam præstet. 2. Ut abscessuli, pustulæve summâ curâ sustineantur , quo debita tempora percurrentes,

tandem contentam in se materiam omninò avehant, ipsæq; etiam evanescant.

Ut itaque paucis de primo agamus ; Sollicitè imprimis cavendum est, hoc tempore præsertim, ne nimium assurgat ebullitio, sive id fiat ex congestis stragulis, sive ex aëre loci, in quo decumbit æger, igne nimium excalfacto, sive ex calidorum medicamentorum & cardiacorum usu ; præcipuè verò ab his cavere oportet, si æger in ætatis flore constitutus fuerit, vel sanguinem habeat generosiori potu nimis exaltatum, vel anhi tempestas, aut verna sit, aut saltem ultra æstatis initium non processerit. Hinc enim fiet, ut separatio, quæ sensim, lentisq; gradibus peragi debebat, ut ad universalem quandam despumationem opportuniùs pergat, præcipiti cursu feratur ; atque ita vel non satis idoneus partium numerus congregetur, vel (quod forte contingat) nonnullæ partes ad secre-

secretionem damnentur, quas aliàs Natura illam subire noluisse, nisi quòd ultra debitos limites excurrere coacta, noxam hanc sibi creet: secretis enim illis quæ ad separationem minùs opportuna sunt, aliorum illuc propendentium motus, eorum commixtione impeditur, adeoque redduntur expulsionì minùs accommoda. Ausim dicere, ex hoc fonte, maiorum *Iliada* profluxisse, nempe ex auctâ nimis ebullitione in principio morbi, dum mulierculæ oblati cardiacis (ut pulvere *Gasconis*, *Diascordio*, & id genus aliis) nihil non fatagunt, ut (si Dîs placet) expellantur statim *variola*, ac venenum à corde removeatur. Imò famigerato illo tutissimoque ut existimant remedio (*Zythogala* intelligo, cui *cornu Cervi* cum *Calendule floribus* incoctum fuerit) non minùs imprudentèr utuntur: Certè enim calido hujusmodi regimine plus mali quotannìs accersitur, quàm ullâ Medicorum pra-

xi, quantumcunq; periculofam illæ arbitrentur, atq; à ratione (*fuâ* ſcilicet) abhorrentem. Mihi quidẽm rationi consentaneum videtur, ut quo diutiùs Natura ſeparationem molitur, ac perficit, dummodò ebullitio non omninò torpeat, eo certius atq; univerſaliùs eadem ſeparatio abſolvatur. Atqui ex illâ ſic abſolutâ, curationis inſequentis ſucceſſus potiſſimum ut dependeat neceſſe eſt, uti ex methodo contrariâ, contrarius planè rei exitus: ex calido enim iſto regimine nihil boni naſcitur; ſicut ex præcoci fructu, nihil frugi; cùm frequentèr uſu veniat, ut vel in *Phrenitidem* æger prono lapſu ruat; vel (quod pejoris notæ eſt) ſudores ingentes oboriantur, ex quibus partes non ſecerni aptæ, neq; *puris* naturæ reſpondentes (quod ipſum tamen pus, genuina ſoboles eſt hujuſce excretionis) eliminantur; vel ex cardiacis illis adminiſtratis calidâq; cuſtodiâ, *variolæ* nimis

mis protrusæ in unum confluant, sædo certè spectaculo, tristemq; eventum interminanti. Atq; hæc & ejusmodi symptomata ex his erroribus progigni solent; cùm ex alterâ illâ methodo nihil unquam mali observaverim. Natura enim sibi permissa negotium suum suo tempore exequitur, materiamq; debito ordine ac viâ tum secernit, tum etiam expellit, ut (in junioribus præsertim vegetisq; temperamentis) nostrâ ope, nostris artificiis, atq; auxiliis non indigeat, suis viribus optimè instructa, suis opibus locuples, suo deniq; ingenio satis edocta. Neq; sanè vel ipse vidi, vel fando accipi, quenquam ex eo periisse, quòd *variola* primò non eruperint; et si nimis multi perierint, quorum *variola* primò laudabiliter, & cum summâ spe erumpentes, postea recidentibus pustulis præmatùre detumuerunt.

Quemadmodum autem inconsultum est, atq; periculosum cali-

dioris regiminis vel Cardiacorum ope cœptam ebullitionem nimis evehere, ita è contrario non minus vacat periculo, mediantibus venæ sectione, clysteribus, emeticis, catharticis, aut refrigerantibus medicamentis eandem minuire; cùm hoc pacto partium separabilium commoda secretio plurimum impediatur. Licet enim vulgare illud, atq; tralatitium argumentum, quo adversùs phlebotomiam, aliasq; evacuationes utuntur (nempe quòd non liceat à circumferentiâ ad centrum movere humores, cùm natura in hoc morbo contrarium affectare videatur) nullarum planè virium sit; eo quòd ex earundem usu contrarius omninò effectus, subitanea scilicet *variolarum* eruptio, sæpissimè consequi deprehendatur: aliæ nihilominus rationes in promptu sunt, quæ vehementer suadent, ut, siquidem ullo modo vitari possit, ab hac praxi manus abstineamus. Namq; (ut earum præ-

præcipuas paucis attingamus) per hæc evacuationes non tantum ebullitio nimis imminuitur, cujus interim ope partes despumandæ accuratè secerni debuerunt, verum etiam illud ipsum subducitur, quod cœptæ secretioni quasi pabulum continentèr suppeditaret; unde sæpenumero contingit, ut *variolæ* primum laudabili impetu erumpentes (eoq; fortassè melius, quod evacuationes jam dictæ præcesserant) paulò post ex improvviso quasi reperiussæ detumescunt, idq; ob eam potissimum causam, quod materia desit, quæ quasi à tergo præeuntem insequeretur, atque agmen clauderet.

Ex prædictis itaq; constat, ebullitionem in morbi principio cœptam, neq; nimis evehi debere, neq; nimis minui. Verum alia omnino res est, Medicusq; ad nova consilia redigitur, si serò nimis accersatur; postquam nempe vel cardiacis adhibitis immodicè ebullitio evecta est, vel phlebotomiâ

miâ inconsultò celebratâ, vel quâvis aliâ causâ mediante, eadem nimis deprimitur, adeoq; ad secretionem impar, atque inhabilis redditur.

Quodsi itaq; primum hoc malum nobis non consciis, nondum scilicet accersitis, aliquando contigerit, sive ex ægrorum intemperantiâ aut calidiori temperamento, sanguis inflammatoriam diathesin nactus fuerit, sive ex astantium muliercularum aut aliorum quorumcunq; consilio, cardiacorum usus *Phrenitidem* invexerit, sive ex *Plethorâ* circuitus sanguinis impeditus fuerit, atque totius massæ quasi strangulatus supervenerit; in his (inquam) casibus, vel secunda vena est, vel regimen imperandum, etsi non prorsus refrigerans, certè tamen nequaquam calefaciens, sive diætâ respiciamus, sive medicamenta. Et quidem in angustiis hîc versatur Medicus, partim dum suo iudicio satisfacere cupit, partim

tum dum præjudiciis aliorum undiq; cingitur, qui, siquidem ægro quippiam secus acciderit, illius mortem Medicorum temeritati acceptam referre solent. Quam ob causam, atq; etiam quòd ipse morbus admodum versatilis ingenii sit atq; incertissimi exitus, ut vel minimum errorem vix tuto admittat, Medicis quibusdam non vitio vertendam censeo suam illam sive prudentiam, sive astutiam (charitatem enim forte aliquis in iis desideraverit) qui statim atque erumpunt *variolæ*, ægrum nutricum curæ relinquunt. Atque pronunciare ausim illius famam in loco valdè lubrico versari, qui in medicando hoc morbo frequenter sese exercet: quando quidem non vulgus solummodò mortis causam satagenti nimis Medico transcribere paratum sit, verum etiam ejusdem artis Professores calumniandi ansam inde cupidè arripiant, atq; coram iniquis iudicibus causam dicentes, severissimam

simam sententiam facillè eliciant ; eo scilicet consilio, ut ipsi pluris æstimentur, & super aliorum ruinis viam sibi sternant ad famam: id quod viris literatis indignum prorsùs est, imò & vilioribus artificibus, modò probitatem colant. Et sanè sæpe misertus sum præclarissimorum quorundam magniq; nominis Medicorum, qui hanc sortem non semel experti sunt, quorum fama non tantùm à proletariis hominibus, & vulgi facie, sed & ab aliis Medicis arrosa fuit, qui forsitan multo majori jure (si quidem in simili negotio versati fuissent) ejusmodi opprobria fuissent promeriti.

Sed ut ad rem redeamus, si venæ sectio prudenter adhiberi nequeat, sive ob opprobrii metum, sive quòd æger vel nondum attigit ætatis suæ florem, vel eundem præterit ; reliquum est ut jubeamus, ne fervor ille, sub quo laborat, quovis modo augeatur, atq; adeò ut non alitèr in lecto cubet, quàm

quàm sanus solebat ; ut locus in quo decumbit (modò tempestas anni temperatior adsit) accenso igne non calefiat ; ut cerevisiam tenuem pane tosto solùm levitèr tepescactam bibat ; ut polentas avenaceas interdum sorbeat, & pomis coctis, aliisq; id genus vescatur. Verùm non permiserim ego, ut medicamentis ullis (ne quidèm *posseto* cum C. C. parato) utatur. Ebullitio autem illa hoc pacto suâ sponte gradatim minuetur & symptomata cessabunt, priusquam aliquid inde mali nascetur, modò sic tractetur æger, uti jam suavisimus ; dummodo sanguis non usque adeò efferus est, atq; ultra omnem modum evectus, ut ne quidem inducias ferre velit, dum hæc fiunt : Nam si ita se res habeat, profectò Medicus ad conscientiam suam potius quàm incertam famam se componens, vel sanguinem emittere, vel medicamentum aliquod, non temperatum duntaxat, sed & paulò magis,

gis, aut etiam impensè refrigerans, exhibere debet, vel etiam aëre liberiori æger refocillandus. Innumera sunt illorum exempla qui his modis ab ipsis quasi Orci faucibus erepti fuerunt. Nonnulli enim nutricum curam fallentes, dum *Phrenitide* detinerentur (miris enim artibus ejusmodi homines sæpe utuntur) atq; è lecto fugitivi aëris frigori semetipsos etiam noctu exposuerunt. Alii frigidam aliquando vel furtim, vel raptim nacti, vel precibus à nutrice emendicantes, hauserunt, adeoque felici errore salutem jam planè desperatam consecuti sunt.

Unicam hic loci historiam ascribere non gravabor, quam ab eo ipso accepi, cujus res agebatur. Is nempe aliquando *Bristolium* profectus, juvenis adhuc, inq; ipso ætatis flore, *variolis* ibidem correptus est, iisq; paulò postea *Phrenitis* accessit. Nutrix in urbem egressa, interim ægrum suum

um aliorum curæ commisit, mox nempe reditura. Verùm dum paulò diutiùs moratur, ægrotus (ut astantibus visum est) interea temporis moritur. Astantes & anni tempestatis, quæ fervidior erat, & habitùs ægri, crassi scilicet atq; corpulenti, rationem habentes, ne foeteret cadaver, è lecto sublatum, ac nudum mensæ imponunt, linteo superstrato. Nutrix tandem rediens accepto nuncio, cameram intrat tristissimo spectaculo interfutura; mox amoto linteo, vultuq; conspecto, subobscura quædam vitæ indicia conspici sibi visa est, ac proinde statim projectum corpus in lectum reposuit, adeóq; sub manu consilium capiens, ac nescio quid satagens, ægrum suum in vitam revocavit, atq; diebus aliquot interpositis sanum conspexit.

Proximo autem loco si torpuerit effervescentia sanguinis, atque tam languida evaserit, ut meritò metuendum sit, ne justæ separati-
oni

oni sit impar futura, rationi consentaneum erit, ut commodis quibusdam Cardiacis ad eandem promovendam utamur. Hæc autem eorum maximè conditio videtur, qui vel sanguinis missione mulctati fuere, vel pinguiore vel phlegmatici sunt, vel qui morbo aliquo nuper attriti fuerunt, vel denique (ut reliqua omittam) qui præsentī *Gonorrhææ* aut aliā aliquā evacuatione laborant. His & similibus, nisi Cardiacorum beneficio suppetias feramus, secretio non succedet, adeoq; nec eruptio pustularum feliciter peragetur, ex quibus ægrorum interitus facile consequetur. Non quod (meā quidē sententiā) malignū quidpiam ac venenati subsit, sed quod sanguis cœptā mutatione in renovationem molitus, eandem exequi nequeat: sanguis enim nunc in morbido statu positus, & intergenium pristinum, quem deponere jam parat, novumq; quem induere gestit, constitutus, cūm regredi

gredi nequeat ut antiquum obtineat, neq; verò præ virium defectu progredi, magnis quasi ausis excidit, & æger viæ necessariò fungitur. Neq; interea ergo, in ipso expulsionis tempore, quo secreta materia ad suppurationem pervenit, si ex quâvis causa foràs intrò revocetur, eandem ægro certam necem inferre, id quod ob eam solam corruptelam accidit, quam ex suâ secretionem sibi acquisivit.

Tandem, ut ad secundam illam indicationem pedem promoveamus ad *tempus expulsionis* accommodatam; quo tempore materia separata parvorum abscessuum, sive pustularum ope amandatur: nempe illud hic agendum est, ut pustulæ debito modo sustineantur, quò ritè atq; ordine destinatam periodum assequantur.

Sicut itaq; suprà satis, ut opinor, ostensum est, imprimis periculosum esse, si æger præsentī febre, ac pustulis vix dum apparentibus.

tibus, in ipso secretionis tempore
nimiùm calefiat; ita etiam non
minori periculo plena res est, si
idem quovis morbi tempore fiat,
atque illo præsertim quod ad ex-
pulsionis initium vergit, crudis
adhuc existentibus pustulis :
quamvis enim sanguis peractâ jam
separatione, atq; relegatâ ad car-
nosas partes materiâ, ab intestino
illo tumultu magnam partem im-
munis sit; interim tamen tener
adhuc, recensque, ac vix novo
statu, & quasi texturâ indutus,
ευραδής est, facilèq; vi caloris im-
modici undecunq; appellentis, af-
ficitur, atq; adeo levissimo mo-
mento irritatus flammam concipit,
& in novam ebullitionem
proclivis est; quæ quidem nova
ebullitio non, uti prior illa, separa-
tionem jam molitur (illam quip-
pe peractam supponimus) verùm
illius loco non tantùm symptoma-
ta superius memorata excitat, sed
& coeptam per pustulas expulsio-
nem interturbat, & contentam
mate-

materiam exagitando noxam parit. Vel itaq; partes jam secretæ, atq; in corporis ^{æiv} depositæ, vehementi illo rapidoq; sanguinis ebullientis cursu abreptæ, in ejusdem massam resorbentur; vel partes carnosæ ultra gradum supurationi debitum excalfactæ, minus commodè illam exequentur; vel deniq; fortassis abortâ hac novâ ægritudine, sanguinis œconomia, ipsarumque carniū tonus pervertitur, usq; adeò ut materiam illam expulsam vincere, eamque solenni more abscessuum coquere nequeat.

Interim non usq; adeò nos illuc intentos esse oportet, quò ebullitionem nimiam in sanguine prævertamus, ut ægrum frigoris injuriis exponendo, pustularum eruptio impediatur. Gradus ille caloris ad harum expulsionem promovendam accommodatissimus, naturalis sit oportet, atq; ejusmodi quæ carnosarum partium temperiei conveniat; quiq; hunc

excedit, aut ab eodem deficit utrinque periculosus est.

Ex dictis itaq; satis manifestum videtur, in quàm incerto lubricoq; sit loco, tum morbus ille de quo loquimur, tum praxis medica, quæ eidem accommodanda est. Quinetiam patet, Medicorum negotium in angusto versari; ut minus mirum sit, si Nutricibus, per se nimiùm plerunq; officiosis & satagentibus, res malè sæpenumerò succedat. Nempe res ardua est, & quæ muliercularum ingenium atq; iudicium superat, gradum caloris huc requisiti definire, præsertim cùm anni tempestas, ægrorum ætas, & vitæ ratio, aliaq; huc spectantia simul pensanda veniant, id quod prudentem profectò atq; sagacem Medicum omninò postulat.

Quòd si autem in hoc morbi tempore vel faciendo quicquam, vel omittendo, sanguis ad ebullitionem denuò concitatus fuerit, opus est ut fervor ille consopiatur
iisdem

iisdem artibus, quas jam antea diximus in *tempore separationis* adhibendas esse.

E contrario si contigerit, ut, vel phlebotomiâ minùs opportunè celebratâ, vel admissio frigore, pustulæ resederint, & materiâ recedente fluxus alvi supervenerit (nam residentibus illis absque alvi fluxu, non adeò res periculi plena est, cum vel noctis unius spatio sæpe denuò erumpant plenius) in hoc (inquam) casu Cardiacis utendum est. Sed cavendum tamen, ne in his exhibendis nimii simus: quamvis enim sanguinem ademeris, fieri tamen potest, ut virium inde jacturam metuens, adeoq; Cardiacis aut fortioribus, aut sæpiùs repetitis utens, novam ebullitionem ex improvviso suscites. Nimirum sanguis adhuc tenerior est, & vim calidioris stimuli facilè sentit; unde fit ut sæpe repetitæ ebullitiones in eodem excitentur, quibus ægrorum mors majori jure tribuenda est, quàm

prægressæ venæ sectioni.

Si *Ptyalismus* in hoc morbo supervenerit (quod sæpe in adultis post calidius regimen, & Cardiacæ, contingere cernitur) bona omnia sperare licet. Certè plerique ita malè tractati, huic symptomati salutem suam acceptam referunt. Morbus enim à viâ naturali, quâ se expurgare tentaverat, digressus, novam hanc molitur, per *salivationem* scilicet; proindeq; dehinc minùs de pustulis curandum est, sed spectanda potissimùm est expuitio, conandumque ut quàm laudabili more succedat. Cavendum etiam, ne *Ptyalismum* hunc quovis modo impedias aut interturbes. Quamobrem à gargarismis, sub quocunq; prætextu, abstinenceatur; quorum usu mortem aliquando illatam observavi, dum sputum aliàs exiturum inhiherent. Solùm hîc cerevisiam tenuem levitèr calfactam admiserim, quâ, si opus fuerit, ægrorum ora abluantur.

Pustu-

Pustulis exarescentibus, ac deciduis, æger sedulò purgandus est, præsertim post *variolas Autumnales*.

Nunc verò ut vestigia jam calcata repetam; Rem totam sic paucis expedio. Si filius meus unicus (cujus ego salutem ac vitam *vel* ipsis *Indiarum* opibus longissimè præpono) ex hoc morbo ægrotaret, hoc ferè modo, nisi forte quidpiam insolens, atq; extra ordinem interveniret, eundem tractari juberem. Et primò quidem illum non decumbere paterer antequam pustulæ prodirent. Dein illis jam apparentibus, non sinerem ut intensiori caloris gradu, vel adjectis pluribus stragulis in lecto decumberet, quàm quibus in prosperâ valetudine uti solebat, accenso interim, non nisi hyeme incumbente ipsi usitato foco, sed non nimis luculento. Porò nollem, ut brachia semper stragulis accuratè cooperta detineret, aut in eodem loco semper jaceret,

nempe ne sudores copiosius erumperent, quos ego tum rationibus jam supra allatis, tum ipsâ experientiâ fretus, fidenter affirmo non absque ingenti periculo (præsertim in adolescentibus) accidere posse. Vellem itaq; ut liber in lecto jaceret, locumq; subinde commutaret.

Ad diætam quod attinet, non impedirem, quo minùs tenuiorem cerevisiam, tosto pane paululum tepesactam, interdum biberet, quem nonnunquam etiam degustaret pro suo arbitrio. Uteretur etiam jusculis avenaceis aliisq; quæ neq; frigoris neq; caloris vim aliquam egregiam obtinent, aut ventriculo concocturo molestiam exhibent. Quinetiam vulgarem illam, rusticamq; diætam non admodum improbarem, nempe ut lacte cum pomo cocto & contuso vesceretur; modò cautum sit, ut eo per vices utatur, & modicè, dempto etiam lactis frigore. Atque hæc sunt omnino quæ

quæ in hoc morbo fieri imperarem, donec decurso stadio jam declinaret, ægrumque purgationi opportunum sisteret.

Verùm objiciet aliquis fortasse, quorsum itaque tot verba de hac re facta sunt, quandoquidem duabus oculis totum negotium confici poterat, nempe *Nihil agendum*? Cui sic respondeo, Me quidè non illibentè hoc molestò opere supersedere potuisse, nisi quòd sententiam meam hactenùs expositam inter duas, easque diversas & oppositas medendi rationes, quarum utraque pari fere imperio inter mortales potita est, collocatam repererim; tum eorum videlicèt, qui venæ sectionem tanquam necessariam imperant, & subinde medicamentis etiam refrigerantibus, ad reprimendam sanguinis ebullitionem nimiam uti solent; tum aliorum, qui Cardiacorum usum vehementèr inculcant, & calefacientis regiminis: nimirum naturam

ram (ut opinantur) ducem secuti, dum morbi malignitatem à centro corporis ad ejusdem peripheriam protrudere nituntur. Sed profectò sententiam nudam nullisq; rationum fulcris subnixam in medium protulisse, nimis absurdum videbatur; sicut è contrario animi mei sensa dissimulâsse parum in se probitatis habere existimabam, cùm persuasissimus sim, ingentem hominum vim ob utramq; praxim (prout illæ dudum obtinuerunt) interemptam fuisse. Interim lubens fateor (idque in præcedenti tractatu probâsse satis mihi videor) in hoc morbo nonnunquam exquisitissimam seduli, ac prudentis Medici operam requiri, qui pro re natâ tùm hùc tùm illùc inclinando, & quasi scenæ inserviando naturæ negotium adjuvet: quanquam hoc ipsum non alibi forsitan fuerit necessarium, quàm ubi cura morbi ex ejusdem naturæ manibus quasi erepta pridem fuit, ægerq; malè

lè atq; imperitè tractatus, Medico nondum consulto, aut accersito.

Unicam hanc annotatiunculam, ne quis fortè sinistrâ interpretati-
one mentem meam detorqueat,
aut eam saltem non satis assequa-
tur, postremo loco subjungam.
In præcedenti nempe *Diatribâ*,
Naturæ nomine sæpius utor, illiq;
varios effectus attribuo, perinde
quasi rem aliquam singularem &
seorsim subsistentem, sed per to-
tam hanc mundi machinam ubiq;
diffusam sub hoc titulo mihi re-
præsentarem, quæ ratione aliquâ
& consilio freta corpora quævis
regeret ac moderaretur: quale
quidpiam de *Mundi Animâ* non-
nulli Philosophorum cogitâsse vi-
dentur. Verùm ad me quod atti-
net, uti nec rerum, ita nec ver-
borum novitatem affecto; adeo-
que antiquam quidem vocem, sed
sensu (ni fallor) & sobrio, & à sa-
nis omnibus non intellecto solùm,
verùm etiam usitato, in hisce pa-
gellis usurpavi. Ego enim quoties
Natu-

Naturam nomino, toties *causarum naturalium complexum* quendam significari volo; quæ quidem causæ brutæ licèt, atq; omni consilio destitutæ, non tamen sine summo consilio reguntur, dum suas quæque operationes edunt, suosq; effectus exequuntur. Nimirum supremum illud Numen cujus vî producta sunt omnia, & à cujus nutu dependent, infinitâ suâ sapientiâ sic disponit omnia, ut ad opera destinata se certo quodam ordine atque methodo accingant, neque frustra quicquam molita, neque nisi quod optimum est, ac toti Rerum Fabricæ, suisq; privatis naturis maximè accommodum, exsequentia: perinde atque automata non pro suo, sed artificis consilio moventur.



Monita ad Lectorem.

1. **M**onendus est Lector inferi debuisse *pag. 66.* immediate post verba, *inferre videbar.* Quando verò post sufficientem sanguinis missionem symptomata remisere, ægerq; ab hoc affectu magnam partem levatus videtur, Catharticum quoddam ex lenientibus est exhibendum: secus enim periculum est, ne *Pleuritis*, cum suâ naturâ admodum sit recidua, iterum recrudescat.

2. Integra illa Paragraphe quæ in *pag. 78.* incipit his verbis *Atq; hæc sunt*, transferrenda est in *pag. 85.* & inferenda post hæc verba *iri confido.*

ERRATA.

Pag. 1. l. 13. l. sit. p. 6. l. 3. l. quamvis. p. 29. l. 13. l. fortiora. p. 31. l. 10. l. apparatus. p. 97. l. 2. l. primùm invaserit. pag. 104. l. 14. l. his.

